


# CIMANYINU CYÀ

## NYAMA WA LWONJI

 Twasàkidilaayi. Nènku yèyè kwamba ne: “Lekèlè nsokome munda Mwèbè.” Mòna’s, ngèèla meeji ne abi’s mbilenga byà dikèma. Ndi muswè aci bilenga, bilenga be. Twasàkidilaayi ne kalolo kònsò.

Ne “Mapingaja malenga,” à menemene kunùdi nwènù bònsò, “dilòòlò dilenga,” ne mabènesha à Nzambi ikalè neenù bònsò.

Mpindyewu, cìdi, cyàkàbìdi, dilòòlò edi, dyèsè dyètù bwà kubuulula mabèji à Dìyi edi, kaaba aka, bwà kulonga. Ntu—ntu munange kwimba misambu; ntu ànu mukùnange. Ne nkàadi misangu yàbùngì mwambile bantu ne: “Panùdi nufika mu Dyulu, nwènù kanùyì mwà kumpeta ku nyùngulukilu wa Nkwasa wa butùmbi mwaba kampànda to, ndàayi lwà kùdìbo bìmba misambu aku.” Nènku mèmè—mèmè ndi muswè kwikala kuntwaku. Nènku ntu munange kwimba kwimpè kwà misambu. Kàdi, mu cikondo cyà—cyà disangisha dyà Èvànjeeliyò, mùdi mapàngadika ne cyà kwangaciibwa, ngèèla meeji ne: “Ànu musambu ùmwè anyì yìbìdi cyanàànà, ne kuya lùkàsà ku Dìyi. Kufila dìbà ku Dìyi.” Nwamònu anyi? Bwalu aci’s ki cintu cyà mushinga—cyà mushinga munène: nkuya buludi ku Dìyi.

Kùvwa muntu kampànda mwab’ewu, bantu bàà pambèlù pàà cimenga, mbasòmbèle mu màshinyì à mukokakoka, ànu lwà paanyimà pàà mwab’ewu, batùvwà ne cyà kutuutakeena naabò kumpàla kwà dìbà mu mapingaja emu, kumpàla mene kwà masangisha. Bòbò biikàle mwab’ewu: ndi ndòmba luse bu mùndi ncìyi mufikè ku dyùja cipungidi aci nànsha; ne nènnumònè dyàkàmwè paanyimà pàà disangisha dimanè kujika; nènku mfwilaayikù luse bwà kwamba ne: “Nèngiikale mwab’ewu,” piinè apu mpâmvwà, bintu bikwàbò bindwìlè, mu mùshindù wà ne, ncìvwa mwà kwikala mwab’ewu pa dìbà adi to.

Mpindyewu, màalabà dilòòlò. . .Tutu misangu yònsò ànu tuleeja cintu cìmwèpelè, Mukalenge Yesù Kilistò, kwàjiki, ne cyònsò cìdi diswà Dyèndè dyà Bunzambi aci cìdi bwà twètù kwenza. Kàdi cyòci diswà Dyèndè dyà Bunzambi màalabà dilòòlò, pa *Citampì Cyà Nzambi*, netwàkulè, bu Mukalenge mwà kwanyisha.

<sup>2</sup> Nènku dilòòlò edi, tudi tufila, bu Yèyè. . . piikalàci ne ndyèsè Dyèndè bwà twètù kucyènza, anyì dyèsè dyètù bwà twètù kuMwenzela Yèyè’s wè, dilòòlò edi, tudi baswè kwakula pa cìmwè cyà ku byena—bwalu byà mushinga mutàmbe bunène byà dìbà edi: *Cimanyinu Cyà Nyama Wa Lwonji*.

<sup>3</sup> Nènku makèèlèlà dilòòlò tuvwa mu bikondo byà èkèleeziyà, *Bikondo Mwandamutekètè Byà Èkèleeziyà*. Ne kubanga ne Cikondo cyà Èkèleeziyà wa Efèsò, wa mu Efèsò; ne kujikijila ku Cikondo cyà Èkèleeziyà wa Laòdikiyà, cikondo cyà ndekeelu cyà èkèleeziyà. Nènku Mukalenge àsakidilèku mabènesha Èndè mpindyewu ku Dìyì patùdi twakula apa.

<sup>4</sup> Mpindyewu twìnyikàâyikù ànu mitù yètù mu katanci kakesè kàà disambila, kumpàlà kwà twètù kubuulula Dìyì dyà Nzambi edi mene.

<sup>5</sup> Taatù wa mu Dyulu wa musàngelulu, tudi ne kusàkidila bwà dyèsè edi ditùdi naadi dilòòlò edi, dyà kwikala ne mwoyi, ne kwikala pa buloba apa, dilòòlò edi, ne kwikala ne bukolè bwà nubidi ne dikàndà, ne mwà kusòmba mu nzùbu, mùdi Dìyì dyà Nzambi munkaci mwà kubadiibwa.

<sup>6</sup> Nènku tudi tulòmba, Éyì Mupikudi mubènèshìibwe, mwikàle Cilongo Cipikudi cyètù Udì mutùsukùle mu Mashi Èndè, ne mùtùkezùle ku mpèkaatù, ne mpindyewu munkaci mwà kutùleeja kùdi Taatù, katùyì kalèma to, mu Kilistò Yesù; swàkù bwà Wèwè kulwa, dilòòlò edi, ne kwangata Dìyì ne kuDìbuulula mu myoyi yètù. Swàkù bwà Nyumà Mwìmpè àshaalè mukwàte ku Dìyì pàdiDi munkaci mwà kulongeshiibwa, ne swàkù bwà Dìye buludi ku kiipàcilà kàadi, kùdi mwoyi wònsò, mwoyi wànyì ne mwoyi wà batèeleji. Bu mutùdi naadi dikèngela, Taatù, swàkù bwà Difidiibwè. Nènku swàkù bwà muntu nànsha umwe kàlèndukidi ku Dìyì edi to. Nènku, Taatù, bu cikondo kanà cyònsò mèmè mwà kwamba cintu kampànda cidì cifwànyine kwikala cibèngàngàne ne bulombodi Bwèbè, swàkù bwà Nyumà Mwìmpè àkangè mukana mwànyì. Ndi njinga ànu kumanya cidì Bulelèlà, ne pashìishe kwendelamù.

<sup>7</sup> Tùbènèshèku pàmwè mpindyewu, tùfwilèku luse ku mpèkaatù yètù, bu mutùdi badisangishe mu nzùbu wa dikuukwila ewu. Nènku swàkù bwà mpèkaatù yètù yikalè mwinshì mwà Mashi, ne nyumà yètù mitèèkiibwe mu lwidi lwìmpè lwà dikuukwila pa dībà edi. Bwalu tudi tulòmba nùku mu Dīnà dyà Yesù. Amen.

<sup>8</sup> Mpindyewu, mvwa ànu ngèèla meeji ne, kapesè kakesè kàà dibèji aka, mvwa mufunde Mifundu yàbùngì bwà... yà kwikala kwoshakù dīsù, bwà kubala, bangabanga. Nènku mpindyewu pàngààbàndi mwab'ewu, mbimwèke ànu bu ne ncyèna ndyùmvwa bwà kubala nànsha ùmwè wà ku yòyi to. Awu ke mùshindù ùtùbi byènzeka pa ciibidilu; mifundu yinaayi anyì yitaanu yà kutwàdijilakù.

<sup>9</sup> Kàdi ndi muswè kubala anyì kwamba eci dyàmbedi, cyà ne, mu dyakula, ncìtu ndyànjlila kwela meeji cyà kwamba nànsha. Nudi bamanyè's, pàmwàpa, ànu bu...Ncyèna ne cyà kwamba cidyànjlila kulongolola kunùtamba nwènù to, nwamònu's, cintu nànsha cimwè. Ndi mwindila ànu Yèyè. Nènku

ànu bu mûndi ncimòna amu, ndi ànu ngòòlola cyanza ne ncyàngata, ne ncyàbanya. Nènku dîbà adi mîngà misangu cidi mwà kuumvwika bu cipapè, mîmgà misangu, kàdi cidi ànu mùshindù ùmwèpelè ùndi ncipeta. Pa nàнку ki—ki mùshindù wùmwèpelè wùndiku mwà kucifila ngwòwò awu.

<sup>10</sup> Mpindyewu, mu cyòci eci, ciikalè... Imàna ncyàmbaku kàbidì dilòòlò edi. Eci kî nciludikila muntu-nkààya kampànda anyi ntèndeelèu wa muntu kanà yònsò ewu to, nwamònu's, nànsha kakesè. Twètù katwèna twitabuuja abi to. Tudi twitabuuja ne tudi beena Àmèrikè balelèlà bàà menemene, mu mùshindù wà ne muntu yònsò ùdi mwà kupeta dyèsè dyà kukuukwila Nzambi bilondeshile bidì kwondo kèndè kàà mwoyi kàmwambila. Nènku tudi baswè bwà kwikalabì misangu yònsò ànu mùshindù awu. Kàdi, mu èkèleeziyà ne èkèleeziyà yònsò, tudi ne dilongesha.

<sup>11</sup> Misangu yàbùngì, mu malongolodi, màngumba, bàdi ne twitabàayi kampànda. Nènku bàdi bàshindameena pa twitabàayi awu ne: “Ewu ngwetù twitabàayi.” Cidi mwambi wela meeji nànsha ciikalè cinyi, bikèngela àyiishè twitabàayi awu, bwalu yèyè ùdi mu dingumba adi.

<sup>12</sup> Ne mwòmò emu, katwèna ne twitabàayi nànsha umwe to ànu Kilstò, ki twitabàayi nyèyè awu; ne katwèna ne mukenji to ànu dinanga; katwèna ne mukànda to ànu Bible. Ne Kilstò ùdi Mutù; ne Bible ki wètù mukànda wà dibala; buloba ke wanyi pàrwasè. Pa nàнку mèmè ntu muswè—ntu muswè ànu kuyiisha mùshindù wùndi ndyùmvwa mulombodiibwe bwà kuyiisha awu, ne ànu mùshindù wùndi ncimòna awu.

<sup>13</sup> Nènku pashiishe mu cikondo eci, mu dyakula nangàngà pa citùpà cipapè, cyùmè ncyông, cyà citàpa ku mwoyi cyà Èvànjeeliyò eci, kàdi, nudi bamanyè's, ewu nnzùbu wa cilumbulwidi. “Cilumbulwidi cidi cibangila ku” (penyi?) “nzùbu wa Nzambi.” Cyà bushùwà. Apa ke pàdi cilumbulwidi cibangila. Nènku kùdi... Wèwè muyè ku tubàdi munwemu emu, ne bikèngela bwà wèwè kupicila ku cilumbù, bàdi ne mukànda wa mukenji kuntwaku, bàdi ne cyà kubala mukenji ewu, bwà kujandula cyùdi ulumbulwila. Nènku mùshindù awu ke ùdibi mu nzùbu wa Nzambi, bikèngela tùcyangàcile ku Diyì dyà Nzambi.

<sup>14</sup> Nènku mpindyewu, misangu yàbùngì, mu bintu ebi, bwà nwikalè batwishiiibwe bwà kuumvwa eci mpindyewu, ne, ndi mufwànyine kwikala mutùpakane. Dyumvwija dyànyì ndifwànyine kwikala dibì. Kàdi ndi nteeta kuDìbala ànu pabwipi menemene, ne kwamba ànu mùdidi dyamba amu. Shàala wèwè ànu ne Mufundu awu, cidi Wu wamba bwà kwamba aci.

<sup>15</sup> Nènku mpindyewu mbibì be, anyi... Pàmwàpa kî ndiswa dyà Mukalenge to, ne pàmwàpa dyòdi, Ncyèna mumanya to, bwà

ne, ndi mufwànyine kujinga kushààla ànu lumingu paanyimà pàà lumingu mu Mukàndà ewu, ànu bwà kushààla mwab'ewu ne kucibandila cikabwela too mu Danyèlè, ne Danyèlè ne Bwàkabuulwibwà, ne kubiswikila mu baprófeta.

<sup>16</sup> Nènku Dìyì dyà Nzambì dyònsò katùpà kààdi kònsò nkaswikila ànu pàmwè. Mikàndà makumi àsambòmbò ne yisambòmbò, mifunda kùdi bantu bàbùngì, mu bidimu nkàmà ne nkàmà bishiilàngàne, kàdi kakùyì nànsha ùmwè ùbèngàngana ne mukwàbò, nànsha ùmwè. Wònsò wa kùdiyì ànu mupwàngàne. Kacya kakùvwakù katùpà kàà mikàndà mifunda bu Wòwò to, pa buloba bujimà.

<sup>17</sup> Bàkaadi, kùkaadi bidimu binunu bibidì, bateete bwà kushintulula Disambila dyà Mukalenge. Bwà kusàkidilaKù diyì òmwèpelè, anyì kuumushaKù Dìmwèpelè, bwà kuDìlengèja. Kwèna ànu mwà kucyènza to. Kaa, nDìpwàngàne. N'Dìyì dyà Nzambì.

<sup>18</sup> Ne ndi ngiitabuujà ne—ne Bible n'Dìyì disonsola dyà Nzambì. Dìyì ne Dìyì dyònsò Dyèndè ndisonsola. Ncyèna ngiitabuujà ne *eci* kí ncisolsola, ne *eci* ncisonola, ne *cyàcyà* ncisolsola to. Ndi ngiitabuujà ne Dìdi dyònsò disonsola. Dìdi anyì dilelèlè dyònsò anyì dyà mafi dyònsò; ne piikalaDi dyònsò disopakaja, dībà adi katwèna bamanyè cyà kwenza to. Kàdi Didi, kantu ne kantu, Bulelèlè. Ndi muswè kulambula mwoyi wànyì pa dībà kanà dyònsò bwà cidi EMU MMÜDÌ MUKALENGÈ WAMBÀ kaaba aka.

<sup>19</sup> Mpindyewu, mpindyewu bàdi ànu munkaci mwà kwangata malòòlò makesè aa. Nènku, byòbì mene, netwikalè ne masangisha dilòòlò dyà disambòmbò, kutùngunuka ànu byà mwomùmwè ne kwikala ne . . .

<sup>20</sup> Bàmwè bàà ku beena mu èkèleeziyà mbambè ne nebiikalè. . . mwòmò ne manyaanù, bwà kubwela mu èkèleeziyà mu dyàlumingu mu dindà, bwà ne bàmwè bàà kùdibò mbàmbè ne mbafwànyine kushààla pambèlù mu disambòmbò dilòòlò, paanyimà pàà disangisha, ne kusukula èkèleeziyà bwà bantu kabàlu mu dyalumingu mu dindà, anyì . . .anyì kabiikadi ne cyà kwenza mudimu mu dyalumingu to, bwà—bwà kulongolola èkèleeziyà. Katwèna. . .Tudi baswè. . .Mémè ncyèna mwena Nsabatù to, kàdi nànsha nànkù mémè ntu muswè kuneemeka dikuukwila adi—adi ànu menemene ne mwànyì mwònsò.

<sup>21</sup> Nènku mpindyewu, dībà adi, ndi ngèèla meeji ne nēmanyiishè mààlabà dilòòlò, pàmwàpa, bu Mukalenge mwà kwanyisha, citwàkwilà bwà mu disambòmbò dilòòlò.

<sup>22</sup> Mpindyewu, dilòòlò edi mpa: *Cimanyinu Cyà Nyama Wa Lwonji*. Nènku mààlabà dilòòlò: *Citampì Cyà Nzambì*. Bidi byena bwalu bibidì byà . . .Ngèèla meeji, byà bitàmbe kwikala byà mushinga menemene byà kwakulapù mu ditùkù edi, bwalu ndi cyà bushùwà ngiitabuujà ne tudì ne mwoyi mu cikondo cyà

dikenketa edi dyà cilumbulwidi cyà Nzambi. Ngèèla meeji ne tudi menemene ànu mu ditùkù dyàci adi. Ne katwèna baswè kwikala bu buumishi bàà maalù to. Katwèna baswè kwikala bakoleshi bàà maalù to. Tudi ànu baswè kuseemenakù ànu ne meeji mimpè ànu mùdi Bible mwà kucyàmba mwab'ewu; ne Ciinë aci's ncipwàngàne, bushuwà.

<sup>23</sup> Nènku mpindyewu mu kwenza kwà cyôci eci, tudi tuumvwa bantu bààbúngi be, leelù ewu, bàdi bààkula bwà cimanyinu cyà nyama wa lwonji. Nukàadi bacyúmvwè kùkaadi ntàntà mule: “Ncinyi ciinë aci? Udi ucyenza nganyi? Mpenyi? Wikala mwà kucipeta ki nganyi's? Nènku bòbò bacipetè, ncinyi—ncinyi cyàbènzèlaci? Ncinyi? Cinyi? Cidi mwà kunwènzela bibi anyi? Kùdikù—kùdikù bwalu bubu ku cyôci anyi?”

<sup>24</sup> Èè, mpindyewu, ki citùdi—citùdi baswè kujandula ku Dìyi dyà Nzambi, cintu cyà kumpàla ne: “Ní kùdikù cimanyinu cyà nyama wa lwonji cyakula mu Bible anyi?” Nènku cintu cidi cìlonda: “Neciikalè cikumbànyine cikondo kaayi? Ne mbantu kaayi bàcipeta's? Kàdi cyùdi mufwànyine kwenza ncinyi? Udikù mufwànyine kucipeta kàdi kùyi mucimanyè anyi?” Ne bikwàbò, abi, bidi ànu nkonko yà mùshindù awu ayi. Pa nànkù, bwà ku dyànyì pàànyì dimanya, dyà ne—dyà ne eci ncifwànyine kwikala cimwè cyà ku byena-bwalu bibidi byà bitàmbe bunène bìndi mufwànyine kwelapù meeji mu Bible, *Cimanyinu Cyà Nyama Wa Lwonji*, ne *Citampi Cyà Nzambi*.

<sup>25</sup> Mpindyewu, cyà kumpàla, ndi ne Mufundu mwaba ewu bwà kuleeja ní. . . anyi mufùme ku diwùfunda, ànu bwà ngaamònakù mwà kuWùbuulula, ne mwinè awu m'Munsantu. . . Ànu kwine kwònsò aku, twànji tumònaayibi cidi cimanyinu cyà nyama wa lwonji, ne: “Mbyà njìwù bwà kupeta cimanyinu eci anyi? Mmwòmò anyi?” Mpindyewu mu Bwàkabuulwibwà, nshapità wa 14 ku mvensà wa 9, mmukenji wà mwanjèlò mwisàtù. Mpindyewu, mumanyi wa dibàla wa Bible kanà yònsò ewu. . .

<sup>26</sup> Ndi mmòna Mwanèètù Stanley mwab'ewu, ne bambi bakwàbò bàbidi anyi bàsàtù basòmbe kaaba aka. Ne makèèlèlè dilòòlò awu kùvwa bàna bèètù kampànda bàà mu sèminèrè wa ba-Baptistes mu Louisville emu, ne pàmwàpa kùdikù bàmwè dilòòlò edi. Ncyèna mumanyè to. Ne kùdi pàmwàpa ba-Méthodistes, ba-Baptistes, beena Kàtòlikè, ne nkufwànyine kwikala beena Yudà bàà ba-Orthodoxes. Ncyèna mumanyè to. Kàdi kí. . .

<sup>27</sup> Eci kí mbwà kutàpa muntu ku mwoyi to; nànsha kakesè. Ne cidi ànu bwà. . . Ànu mùdi Bible mufundìbwe amu, bwà kuCibala, ne kunùlekela nuCitàngila, nwènù biinë. Nènku tuseemenàayiKù ne meeji mu ónsò, mu diciinà dyà Nzambi, bamanyè ne Yèyè neatùlumbulwishè bwà mèyi ètù. Mèyi ètù neatùbènèshè anyi neatùpiishè ku Ditùkù dyà Cilumbulwidi.

28 Nènkù mèmè ngùmvwà ne ndi mumanyè cintu kampànda, kàdi kucilaminýina, díbà adi Nzambì neàndumbùlwishè bwà cintu aci ku Ditùkù dyà Cilumbulwidi; ne misùùkà ne byanza byàyì, bàmba ne: “Mwanèètù Branham, bu wèwè nànsha ànu mutwámBILE, nùnkù katùvwà bafwànyìne kusanganyibwa mu ngiikàdilù ewu leelù ewu to.”

29 Ndi muswè kwimana bu Pòlò wa kale awu ne: “Kwànyì ku mwelè kakwèna mashi à muntu nànsha umwe to. Bwalu ncyèna mudikànde bwà kunwámBila patòòke mubelu wònsò nkòòng wà Nzambì to.” Ncyà bushùwà, ànu mùndì nCimòna amu; nènkù mèmè mutùpàkàne, díbà adi Nzambì àmfwilèku luse. Bintu ebi kacya kabitukù bìlwa . . . Ncìtukù muyè ku sèminère nànsha umwe to, kacya ncìtukù muyè ku cilongelu kampànda, ncìtukù mwanjì kwangata díyì dyà muntu mukwàbò nànsha umwe pa Cyòcì aci to. Ndi mubwele ànu buludì mu Bible, mu disambila. Ne eci ncimbuulwila kùdì Nzambì ku Nyumà Mwímpè, Mwanjèlò umweumwe wa Nzambì udi undombola bwà kumòna bikèèna-kumòna ne bikwàbò byà mùshindù awu, ne dyondopa dyà babèèdi. Ne nudi mwà kulumbulwishila ku cyòcì aci bwà ne Cìvwa mwà kwikala cilelèlè anyì to.

30 Mpindyewu, eci m’mukenji wà mwanjèlò mwisàtù, bwà bàà pa buloba. Nènkù nudi bamanyè mùdì bwalu anyì, mukenji wà mwanjèlò mwisàtù awu, wùdì munkacì mwà kupàtuka mpindyewu mu ditùkù edi. Eci ndibuuka dyà mukenji wà mwanjèlò mwisàtù, pawikalà mubadi wa Bible.

31 Kwàkalonda makènga àsàtù. Dyàkumpàlà adi dyàkenzeka mu Mvità Yà Kumpàlà yà Buloba bujimà. Dibìdì dyàkenzekela mu Mvità Miibìdì yà Buloba bujimà. Nudi numòna citùdì tubwelamù mpindyewu aci. Èyo. Tukààdi ku ndekeelu kwà njila.

32 Mpindyewu twànjààyi kwangata eci mu meeji etu, kumpàla menemene kwa twètù kubala Mifùndu. Bilondèshìle myaba, tudi ne cyà kwikala ku cikondo cyà nshìikidilu. Too ne díbà kaayì? Ncyèna mumanyè to; muntu nànsha umwe kí mmumanyè to.

33 Kàdi, tàngilààyi, twàngatààyi ngakwìlù wa maalu malonda. Bidimu binunu bibìdì byà kumpàla abi, dilondangana dyà maalu à pa buloba dyàkafika mu katòngòbèlè, ne Nzambì wàkabùtula buloba ne màyi. Nudi bamanyè aci anyì? Pashiishe kupatukakù buloba bupyabùpyà. Nènkù bidimu binunu bibìdì biibìdì abi, byàkafika cyàkàbìdì nu ndekeelu kwàbì, ne Nzambì wàkatùma Yesù. Ncyà bushùwà anyì? Eci ki nshìikidilu wa bidimu binunu bibìdì bidì bilonda ebi, cidimu cyà 1954. “Nènkù Èvànjeeliyò,” mwàkambà Yesù, “mudimu awu wùvwà mwà kwipidijibwa,” (Bwà cinyi?) “bwà bwalu bwà basungula, cyanààna mubidi nànsha ùmwè kawùvwà mufwànyìne kusùngidiibwa to,” bivwa mwà kwikala bitàmbe kwikala byà bibì menemene. Pa nànkù tukààdi ku cikondo cyà nshìikidilu. Ne pashiishe cyà

mwandamutekète, mu cifwànyikijilu, m'Bukalenge bwà bidimu cinunu, bidimu cinunu.

<sup>34</sup> Mwàkakwàtà Nzambì mudimu bidimu binunu bisambòmbò, tudi bamanyè ne bidimu cinunu. . . “Ditùkù dimwè mu Dyulu didi bidimu cinunu pa buloba,” Peetèlò Mwibìdi. Nwamònu anyì? Mpindyewu, kè Nzambì kwibaka buloba munda mwà bidimu binunu bisambòmbò. Nènku Èkèleeziyà wàkakwàta mudimu ùlwisha mpèkaatù mpindyewu munda mwà bidimu binunu bisambòmbò. Ne cinunu cyà mwandamutekète, Nzambì kwikishaYè, ne kwikishaYè mu cyà mwandamutekète; nènku mpindyewu cifwànyikijilu cyà Bukalenge bwà bidimu cinunu, bwà Èkèleeziyà kwikalayè ne mwoyi pa buloba apa, apa mene mu mmwènekelu wa mubidi, munda mwà bidimu cinunu, kakùyì māsāmā, tunyinganyinga, lutātù, anyì lufù nànsha. Cikondo cinènè cyà ngòlò, cidì munkaci mwà kulwa mpindyewu aci's! Kaa, bwà aci's! Kaa, mēmè ntu munangè musambu awu wà ne:

Buloba bùdi bùtwa mikemu, bwèla mbilà bwà  
ditùkù dyà diikisha dyà kalolo,  
Dyàlukilā cyākābīdī Yesù pa buloba.

Ndi muswè aci.

Mpèkaatù ne tunyinganyinga, bīsāamā ne lufù  
lwà buloba bwà mīdimā ebu nebījikè,  
Mu bukòokeshi bwà butũmbi ne Yesù bwà  
bidimu cinunu byà ditalala.

Bible mmwambè ne: “Bààkalombola ne kukòokeshi ne Kilistò munda mwà bidimu cinunu,” Bukalenge bwà bidimu cinunu.

Mpindyewu, mukenji wà mwanjèlò mwisātù ewu, kumpàla menemene kwà Dilwa dyà Mukalenge, pàakatwībwbwà Cítampì ne cimanyinu. Mpindyewu, nekwikalè, dikùngwila dinène, dikùngwila kampànda.

<sup>35</sup> Ku Wesètè kwàka, patùtù tupàtuka, mvwa ne ciibidilu cyà, mvwa kwambwila pancivwà nsongàalùmè, mpàtuka bwà kakùngwija nyama mu Muvù wà Bintu bitòloka ne bwà dikùngwija dyà nyama mu Muvù wà mabèji àpòòpoka, mpàtuka nya na mikùnā ne mpwekesha ngombe kwīnshì. Nènku paanyimā pāā twètù bamanè kupeta ngombe yònsò yitùdi mwà kupeta ayi, mu mwaba wònsò, dībā adi tuvwa tuumusha yònsò yìvwā kayì- . . .yìvwā kayìyì yètù ayi. Yètù yidi ne cimanyinu, nènku mmyenza cimanyinu. Nènku ní nukādikù . . .

<sup>36</sup> Muntu kampànda ùkaadikù mumòne ngombe mutwa cimanyinu awu anyì? S'ncintu menemene cyà kumòna pādìbò bātwa ngombe cimanyinu. Mvwa ne ciibidilu cyà kuumvwila ngombe luse. Nènku mbukooyā bwètù bwà bwèndesha ku mwoyi ebu dībā dinùdi nutwādija kutwā ngombe cimanyinu. Kwela cyamù cyà kutwā naaci ngombe cimanyinu mu mudilu ke ùvwā wānyì mudimu, kwambula cyamù aci. Ne kucitèeka pa

nyama wa lukùngùlù uvwa mulààdika mwaba awu, ne bikòndò byèndè biswika; ne kumulamika cimanyinu aci, ne myòsà ne munyìinyi bisàba màfutà; kwela budimbwa bukesè pamutù apu, kàdi kumusùlula. Nwènu bàtù bàmbambà bwà lubilu's wè! Udi ùya lùbilu lwà mùsà bulelèlè. Kàdi, tàngilà, mmutwìbwe cimanyinu.

<sup>37</sup> Nènku mùshindù awu ke ùdi Nzambi ùtwènza twètù. Bikèngela wèwè kupweka ku cyoshelu ne kuswikiibwaku, bwà katanci. Kàdi, mwanèètù, pàdi Nyumà Mwimpè ànu ùkutwa cimanyinu, udi mwà kwenza ndambù wa dinyemakana ne kwela mbilà mikolè, kàdi udi mutwìbwe cimanyinu. Ncyà bushùwà. Udikù. Pàdi Mfùmù wa mudimu ùpicila mwaba awu, Yèyè mmumanyè ne wèwè udi wa penyì.

Kàdi, kaa, bwà ngombe wa cidimu cimwè udi wènda ùlalakana, mulùmyànà udi mupishiìbw'awu kwalujidiibwaye munkaci mwà mi—mikwàbò.

<sup>38</sup> Mpindyewu, cikondo cyà ditwìbwa cimanyinu. Nènku mpindyewu nekwikalè ànu babàndi bàà pa tubalu bàbidì mu cyòci eci, nebiikalè Nzambi ne Sàtaanà. Sàtaanà neàngatè bèndè, ne Nzambi neàngatè Bèndè. Dilòòlò edi netùmonè ne udi muvwàle cimanyinu cyà Sàtaanà nganyi, nènku mààlabà dilòòlò netùmonè ne udi muvwàle cimanyinu cyà Nzambi nganyi, bilondèshìle Dìyì dyà Nzambi.

<sup>39</sup> Mpindyewu mukenji wà mwanjèlò ngwòwò ewu, mvensà wa 9 wa nshapità wa 14. Nèmbalè ndambù wa Mifundu eyi mwab'ewu, yìndì mufunde. “Nènku mwanjèlò . . .”

*Ki mwanjèlò mwisàtù kubàlondayè, wàmba ne dìyì dikolè ne: Muntu yèyè mukuukwile nyama wa lwonji ne cimfwànyi cyèndè, ne mupetè cimanyinu cyèndè pa mpàlà pèndè, anyì. . . mu cyanza,*

*Yèyè awu neànwe mvinyò wa ciiji cicolè cyà Nzambi, udi mupòngolola kàyì musambakaja mu lupànza lwà ciiji cyèndè; ne. . . neàkengeshiìbwè ne kapyà ne soufre mu bwikadi bwà banjèlò bàà cijila, ne mu bwikadi bwà Mwàna wa mùkòòkò:*

<sup>40</sup> Ncyà bushùwà ne ncyèna muswè kwikala ne bwalu ne abi to! Tàngilàayi.

*Ne mwishì wà dikèngeshiìbwa dyàbò wàkabànda bwà kashidi ne kashidi: ne kabèèna ne ditalala munya anyì bufuku to, bàdi bàkuukwila nyama wa lwonji ne cimfwànyi cyèndè, ne ewu yònsò udi upeta cimanyinu cyà dinà dyèndè.*

<sup>41</sup> Ncyèna muswè kwikala mu abu bwalu to, ndi mutwishìibwe. Èyowà. Tèèlejàayi mvensà udi ulonda awu, pàndì mmutàngila apa.



*Lutuùlù lwà bansantu ndwòlù elu: ki bàdì balamè mèyì matùma à Nzambi mbwòbò aba, ne biikàle ne diitabuujà mu Yesù Kilistò.*

42 Mpindyewu nshapità wa 15, ku mvensà mwi2. Nènku... Tèelejàayi mpindyewu, mu nshapità wa 15 ku mvensà mwi2. Mpindyewu, tuvwa tubala kubangila ku mvensà wa 14, ku mvensà wa 9. Mpindyewu wa 15, ku mvensà mwi2.

*Ne wakumpàla wákaya, e kupòngololayè lupànzà lwèndè pa buloba; ne kwàkakùluka bintu byà lulengu...byùjà bidì bisaama bikolè pa...bantu bàvwà ne cimanyinu cyà nyama wa lwonji, ne pa aba bàdì bàkuukwilà cimfwànyi cyèndè.*

Nshapità wa 16 ku mvensà mwi2.

*Ne udi bamfùmù bàà pa buloba bendè nendè masandi, ne bàdì basòmbèle pa buloba mbabafikishe ku dikwacika mvinyò wa cijì cicolè cyà masandi.*

43 Anji indilàayi kakesè. Mfwilàayikù luse. Ndi mukùdimuna, ndi ne cyà kwikala mubuulùla mabèji àbidi dyàkàmwè. Èyo. Mpindyewu nshapità wa 20 ku mvensà mwi4. Èyo, nyèyè ewu.

*Nènku ngákamòna nkwasà yà butumbi, ne aba bàvwà basòmbapù, ne bààkapèèbwa bukòòkeshi bwà kulumbulwisha: ne mèmè kumòna misùukà yà aba bàvwà bakòshìibwe mutù bwà bujaadiki bwà Yesù Kilistò, ne bwà díyì dyà Nzambi abu, ne bàvwà kabàyi bakuukwile nyama wa lwonji abu, anyi cimfwànyi cyèndè, anyi kabàyi bapetè cimanyinu aci pa mpàlà pàábò to, anyi mu cyanza cyábò; ne bààkashàala ne muoyi ne bààkakòòkeshà ne Kilistò munda mwà bidimu cinunu.*

44 Kwèna mwà kupeta cimanyinu cyà nyama wa lwonji ne pashìishe kukuukwila Kilistò anyi kwikala Nendè to. “Kàdi ewu yònsò wàkuukwila nyama wa lwonji anyi cimfwànyi cyà nyama wa lwonji awu, neàkèngeshiibwè mu bwikadi bwà Nzambi ne mu bwikadi bwà banjèlò bàà cijila.” Ki cidi Mukalenge wamba pa bwalu abu ncyôci aci.

45 Mpindyewu netùbangè. Buululaayi mu Bible wenù mpindyewu mu nshapità wa 13 wa Bwàkabuulwibwà, nènku netùbangè ànu mu katanci kakesè emu. Mpindyewu eci cidi cyà mushinga wàbúngì. Nènku tèelejàayi ne ntèmà yònsò mpindyewu.

46 Dyàmbedi, tudi baswè kwangata cyena-bwalu cyètù kuumukila ku makèèlèlè dilòòlò. Makèèlèlè dilòòlò tuvwa bangàte pa bikondo byà èkèleeziyà, ne, mutùvwà bamòne Yesù mwimàne mu Èkèleeziyà Wendè: “Wàkula bu díyì dyà màyi àbúngì; ne Yèyè úvwà ne nsuki bu myòsà yà mùkòòkò; mèsù bu ndimì yà kapyà.”

47 Vùlukàayi ne, Bwàkabuulwibwà yònsò awu—awu ncikèèna-kumòna, ne cifwànyikijilu. Byònsò abi bidi ne dyumvwija kampànda, pa nàнку bikhèngela nùtabaleelè ne ntèmà yònsò. Balàayi bapròfetà, nùmonè cìvwà bimfwànyì byùmvwija, nùshìishè nùfwànyikijè mwab'ewu bwà nwamòna mwà kumanya cìdi bimfwànyì byùmvwija menemene.

48 “Bàvwa ne mèsù bu ndimì yà kapyà,” banyeemakana bàtwa kumpàla ne paanyimà pàà buloba. Ki twètù kujandula ne ndimì yà kapyà ayì, bu. . . “Myelè yà mvità, mwelè wà mvità wùvwà wùpàtuka mukana Mwèndè, ne mwelè wà mvità wà nseke yìbìdi,” ki twètù kujandula ne aci cìvwà n'Dìyì dyà Nzambì dìvwà dipàtuka mukana mwà Èkèleeziyà. “Nènku dìvwà mwà kukòsa too ne mu bwongò bwà mufùbà, ne dijinguludi dyà meeji ne mapangadika à mu mwoyi,” Ebèlù nshapità mwi4.

49 Tudi basangàne Èkèleeziyà mwimàne mwaba awu mu bulenga Bwèndè; Kilstò mudìfwimbileMù ànu cyanàànà! Ne Èkèleeziyà ùvwa muvwàlè “cìvwàlu citòòke” pambidi. Nènku nudi numòna ne, Ùvwa m'mukàji, “pa cyàdi cyèndè,” Ùvwa ne cìvwàlu cibwikile bundù Bwèndè; ne ùvwa ne “mukàbà wà ngòlò” mucinyùngùlùkile, ùvwa mucikwàcile pa cyàdi. “Mutòòke,” wàkula bwà bwakànè bwà Kilstò; ne “mukàbà wà ngòlò” wùvwà ùleeja Èvànjeeliyò. Dìyiisha dyà Èvànjeeliyò didi ditwàla Nyumà Mwìmpè pa Èkèleeziyà, bwakànè bwà Kilstò; òmukwàcilapù, muswìka ne nshinga, nshinga wa mukàbà.

50 Pashìishe Yèyè ùvwa mwimànyine pa: “makàsà bu cyamù cyà mìtakù, cìvwà cyoshìibwe mu cikùtù cyà kapyà.” Cyamu cyà mìtakù cìdi cyàkula bwà cilumbulwidi cyà Nzambì. Nènku Nzambì, bwà kutuuyishayè mucipù Wèndè munèna wàkadicipàYe awu, Wàkatùma Kilstò, ne Kilstò wàkafata cilumbulwidi cyà Nzambì. Ne pashìishe Èkèleeziyà ùdi mushìndàmèène pa cilumbulwidi cyà Nzambì, Kilstò mwimàne pa kaaba Kèndè. Cimfwànyì cilenga kaayipu's wè: “Mwimàne mu Bitèekedi byà myèndù byà Ngòlò Mwandamutekète!”

51 Ne pashìishe tudi tusangana ne cikondo cyà kumpàlà cyà èkèleeziyà, cìvwàbo naaci aci. Mbanganyì bàvwà kaaba aka makèèlèlè dilòlò awu? Tùmonèbi cyanza cyèbè. Èyo, abi's mbìmpè. Cikondo cyà kumpàlà cyà èkèleeziyà, tudi bajandùle ne, mu Cikondo cyà Èkèleeziyà cyà Efèsò, bàvwa ne dibàtiiza dyà Nyumà Mwìmpè. Nènku bààkabàtiiza bantu mu màyi, ne bàvwa ne. . . Bimanyinu byà mishindù yònsò ne maalù à kukèma bìvwa ne cyà kufila mwena kwitabuuja awu.

52 Ne mùshindù mwinè, mu cikondo cyònsò cyà èkèleeziyà, ke kubangaCì kubwicidila. Cipungu ciibìdi, cipungu ciisàtù, pashìishe kupìcila ku cikondo cyà mìdimà. Ne bààkapàtuka ne dìnà dyà mashimi, ne dibàtiiza dyà mashimi, ne bwà màyi ne Nyumà Mwìmpè.

53 Nènku pashiishe kutùngunukabò, cikondo cyàkalondà, ne bààkakenkesha bukênkè bubàndile ndambù. Ne pashiishe kùvwa ciibi citèèka, bwà dikànguka, pankaci pàà Cikondo cyà Èkèleeziyà wa Filàdèlèfiyà ne Cikondo cyà Laòdikiyà.

54 Nènku pashiishe cyà Laòdikiyà kushàalaci cimvùmvù ne kupàtukaci mu Cyòci aci cyònsò, mu mùshindù wà ne Nzambi wàkacilùka mukana Mwèndè. Ncyà bushùwà. Aci's m'Mufundu.

55 Ne mwena maalu-malonda yònsò ne mwena kwitabuuja yònsò udi orthodoxe mmumanyè ne Bikondo Mwandamutekètè byà Èkèleeziyà abi, anyi "Bitèekedi byà myèndù byà Ngòlò Mwandamutekètè," mùdi Bible mwambè, bìvwa m'Bikondo Mwandamutekètè byà Èkèleeziyà. Bu mùdi Dipungila Dikùlukulu cimwènekela mu Dipyadipyà emu, ne ànu mwàkapàtukàdi.

56 Kàdi kùdi ne cyà kwikala dinyungishiibwa dinène ne ditàbuluja pabwìpi menemene ne dijikija dyà cipungu cyà bàà Bisàmbà byà bendè, kumpàlà kwà beena Yùdà kuCyàngatabò cyàkàbidi.

57 Vùlukaàyi ne, bàà Bisàmbà byà bendè bàdi ànu beelela mikàlu, cikondo cibàkòsela bwà ngàsà. Bible mmwàmbè ne: "Nebàdyatakajè ku makàsà bimanu byà Yèlusàlèmà," Yesù wàkamba ne: "too ne pààjikà cipungu cyà bàà Bisàmbà byà bendè." Ncyà bushùwà. Bàdi ne cikondo cibàkòsela bwà kujikija.

58 Ne tudi tusangana bintu byàkenzàbo kale wàwa abi. Tudi tumòna bimanyinu ne maalu à kukèma bìvwa bibàfila, mùvwa Kilistò mubàmbile mùvwàbi bilenga bilayà, ne mùvwàbi amu. Dìbà adi Bukênkè kubangabù kubwìcidila ne kubwìcidila, kujìmabù. Ne pashiishe ànu ku ndekeelu menemene, kùvwa ne cyà kwikala cikwàbò ciibi cyunzulula citèèka bwà Èkèleeziyà. Mpindyewu twànjàayi kwimana apa kumpàlà kwà twètù kubwelamù. Mònaayi, twàngatàayi cipròfetà cikwàbò cidi cimvwilà mu meeji eci. Mupròfetà wàkamba ne: "Nekwikalè ditùkù kampànda dikalè kadiyi ní mbufùku ní muunya to."

59 Díyi dyànyi ndipitepite bukolè anyi? [Disangisha didi dyàmba ne: "To."—Muf.] Ní nudikù mwà, nudi mwà kupwekeshakù díyi ndambù...Ndi mumanyè ne dídi ditwa dyàlukila, ke bwà cinyi ndi ngàakula ne díyi dibàndisha ndambù, bwà bantu bàà mu ndekeelu mwàmwa bààmòna mwà kwikala batwishiibwe bwà kucyùmvwà. Bwalu, Eci ncyà mushinga mutàmbe bunène.

60 "Nènku nekùlwe cikondo, ditùkù kampànda," mwàkambà mupròfetà awu, "diikalà kadiyi ní mbufùkù ní muunya to." Mu ngaakwilù mukwàbò, nekwikalè bukênkè, kàdi nekwikalè mavuba, nwamònu's, ditùkù dyà mavuba. "Kàdi ku ibaamulòlò nekwikalè Bukênkè." Cimfwànyi cilenga kaayipu's wè!

61 Mpindyewu, pàakacyàbu mu ditùkù dyà mavuba edi, mbwena kwamba ne nekwikalè mvità, ne ntàtu, ne mabika ne

mala, ne bipungu, ne maèkèleeziyà, ne tusumbù, ne bikwàbò byònsò. Kabyàkwikala bukènkè anyi mîdimà to. Necìkale cikondo citùdi bamanyè ne kùdi Nzambì, ne kùdi Èvànjeeliyò, kàdi kabèèna ànu mwà kumwèna ku Yéyè to. Nudi bamanyè cîndi muswè kwamba aci anyi? Nebámbe ne: “Bible mmwambè ne bààkenza *cyòci aci* kale wàwa ku Mpenta, bààkenza *cyòci aci* mu Èkèleeziyà wa ku cibangidilu, bàvwa ne bimanyinu ebi ne maalu à kukèma, kàdi wetù—wetù èkèleeziyà kàtu ùlongesha Aci to.” Nwamònu’s, kuulu kùdi mavuba, kakùyi ní mîdimà anyi muunya to. “Kàdi, nànsha nànkù, tudi twitabuuja Yesù Kilistò. Tudi twitabuuja Dilwa Dyèndè diibîdi, ne tudi bamanyè ne Yéyè ùlwalwa.”

<sup>62</sup> Bible mmwambè ne: “Kakwàkwikala ní m’bukènkè anyi mîdimà nànsha.” Kwèna mufwànyine kucibiikila ne nditùkù to, ne kùyi mufwànyine kucibiikila ne mbufùkù to. Kàdi, mònaayi ne: “Ku ìbaamulòòlò nekwikalè Bukènkè,” ku ìbaamulòòlò!

<sup>63</sup> Pàdi bantu bàà ku esètè. . . Mukàndà ewu m’Mukàndà wà ku esètè; ke cidi Bible. Cikondo cyàkakenkeshà Bukènkè dyàmbedi pa Èkèleeziyà wa ku cibangidilu, ku Efèsò, èè, tudi tuvùluka ne bamòne cyàkenzekà kuntwaku; Bukènkè bwà Nzambì bwàkopicishila mu Yesù Kilistò, ku dipòngoloka dyà ntwàdijilu dyà Nyumà Mwimpè. Wàkafila Bukènkè kùdi bàà pa buloba bujimà, ne kufùnda Bible. Ncyà bushùwà anyi?

<sup>64</sup> Mpindyewu Yéyè wàkalaya, beena ku wesètè, dîbà ditu dijuuka ku esètè, ku ntwàdijilu kwà cipungu cyà ngàsà, nènku mpindyewu dîbà dikaadi dyènda dibwela mu wesètè, pa bantu bàà ku wesètè. Twètù tudi bantu bàà ku wesètè. Ne Yéyè wàkalaya ne kùvwa mwà kwikala ditàbuluja ne kùvwa mwà kwikala Bukènkè ku ìbaamulòòlò. S’ke twètù aba. Bukènkè bùdi bùkenkesha, “kàdi mîdimà kayàakuBùmvwakù to.” Ki cyòci aci. “Bantu mbanangè byenzenedi bibì kutàmba mùdìbo banangè byenzenedi bimpè.”

<sup>65</sup> Kàdi cikaadi ànu pabwípì ne kupwekela pa ntwàngèenu wa dyulu ne buloba awu. Nènku Bukènkè bukesè butùdi naabù abu, kwàta ku Bwòbò. Tàngilàayi, Ndîbà òmwèdìmwè dyàkajuukilà beena Yudà kuntu kwàka adi, ndidì dîbwelela pa bàà Bisàmbà byà bendè apa. Mu cikondo cijimà eci, munda mwà bidimu binunu bibidì ebi, bàvwa ne *cikampànda*, ne *cikansanga*, ne malongolodi ne bipungu, ne *cikampànda* ne *cikansanga*. Ne bantu kî mbamanyè mwaba ùdìbo biimànyine to.

<sup>66</sup> Kàdi Bible ùdi ùlaya, Nzambì ngwàkalaya, ku mupròfètà, ne: “Ku ìbaamulòòlò nekwikalè Bukènkè.” Nkwikalè Bukènkè ku ìbaamulòòlò. Ndi ngiitabuuja ne ki twètù aba’s. Dîbà dikaadi dyènda dibwela. Bufiki bwònsò bùdi munkaci mwà kutwà mikèmu, bwèla mbilà bwà ditùkù adi. Mònaayi.

<sup>67</sup> Mpindyewu tudi tusangana, ne, cìvwàbo naaci ku cikondo cyà kumpalà cyà èkèleeziyà aci, bàvwa ne dilongesha dyenyi.

Cintu cyà kumpàla, dyàkavwijiibwa ànu “byenzedi kampànda.” Yèyè wàkamba ne: “Wèwè udi mukine byenzedi byà beena Nikàlàwù.”

<sup>68</sup> Ndi ndikonka ne civwà beena Nikàlàwù ncinyi? ndi ngèèlapu meeji, ne mu maalu-malonda, emu ne emu ne emu, kupicila ku dyela dyà nsèke ditàmbe bwimpè dìmvwà mwà kupeta, ne muntu nànsha umwe kènà mwà kumanya to, ànu cyôci ciikàle dilongesha kampànda dyàkatwàdijàbo kùdì muntu, Nic, Nicolas, uvwàbò bàcinka ne ùvwa mwà kwikala umwe wa ku bàapostòlò wa ku bàakapàmbukà abu. Wàkadilongolwela twitabàayi kampànda, anyi cintu kampànda cikwàbò, ne kwambwila ku cyôci aci beena Nikàlàwù kutwàdijabo. Cívwa mbyenzedi, dyàmbedi. Ne civwà “byenzedi” mu Efèsò aci, mu cikondo civwà cilondà cyà èkèleeziyà kulwaci “dilongesha.” Ki pashiishe kubwela mu bikondo byà mîdimà byà dikèngeshiibwa.

<sup>69</sup> Mpindyewu dilongesha dìmwèdìmwè dyà beena Nikàlàwù dyàkabangà apa mu èkèleeziyà wa kumpàla adi, paanyimà pàà bipungu bisàtù anyi binaayi byàkumpàla byà bàpostòlò, cyàkashààla cyenzedi. Kubangabo kudyambidila ne: “Èè, *eci’s* ncifwànyine kwikala Cyôci.” Mpindyewu nwènù bônso nudi bamanyè mùdìdì dipàtùke, ne nwènù babadi bàà Bible.

<sup>70</sup> Mpindyewu, dyàkatwàdija twipacila ku cidimu cyà 600 paanyimà pàà lufù lwà Yesù ne . . . anyi 306, cidìbo bàbiikila ne dikùdimuna dyà mucìma dyà Constantin. Kacya Yèyè kàvwakù mukùdimùne mucìma to. Mulùmýànà uvwa mufwànyine kwenza bintu byà bukooyà bivwà muntu awu mwenzè abi, kàvwa mukùdimùne mucìma to. Ncyà bushùwà. Cintu cìmwèpelè cìtùye pèndè mwènzè, civwàku ne ntèndeleeleu kampànda—kampànda mu cyôci, wàkaasa nkùrusè pa èkèleeziyà wa Munsantu Sofia. Aci kacivwakù cintu kampànda, cyà kuyiila mu Dyulu anyi? Èyo. Wàkambila beena Kilistò ne, bu yèyè mwà kucimuna mvità ayi, ùvwa mwà kulwa mwena Kilistò. Ki kusambilabò. Ki kupàtukayè e kucimunayè mvità ayi, anyi kucimunayè mvità ayi, ne kwalukilayè e kwamba ne: “Èè, nènkaashààlè wa mu èkèleeziyà.” Cimfwànyi cilenga cyà dikèma cyà cidimba cyà civùmvù cyà èkèleeziyà leelù ewu. Ncyà bushùwà. Kwasa nkùrusè pa èkèleeziyà apu.

<sup>71</sup> Paanyimà pàà lufù lwèndè . . . Yèyè ùvwa ne bânà bàà balùme bàbìdì, bânà bàà balùme bàsàtù; Constantin, Constantius, ne Constantinople, cyàkatwàdija kwenza Loomò wa ku esètè ne wa ku wesètè, ne bàkapanduluka. Ne mwómò amu, dîbà adi, ùlwa Bukalenge bwalàbàle bwà Ottoman, mu ciine cikondo aci.

<sup>72</sup> Ne pashiishe, bôbò, lwà mu cipungu ciibìdì, anyi ciisàtù, cipungu ciinàyi cyà bàpostòlò; ne pashiishe, katanci aka anyi, kubangabò kukòkangana munkaci mwàbò. Ki kukòsolokabò, kasumbù kakesè kampànda.

<sup>73</sup> Bantu bônso, panùdi nwangata èkèleeziyà. . . Mwaba awu, pàvwà èkèleeziyà wa ba-Méthodistes bàà cyena Wesley awu mu bukòokeshi, yèyè ùwà bukòlè pàvwà John Wesley pànwapa. Ba-Luthériens bàvwà ne bukòlè, mu ditùkù dyèndè; ne muntu ne muntu. Kàdi mwashi wa cisumbu aci àdìdingèbi ànu àfwe, dyàkàmwè, ne dîbà adi bàdi bàlaluka.

<sup>74</sup> Pààkamwènekà Mukalenge dyàmbedi kuntu kwàka; pààkaswàbo bwà mèmè kubanga, kwenza bulongolodi pa Eci, ne bikwàbò byà mùshindù ewu. Mèmè kubànda kunweku, ne mèmè kumòna mwaba ùvwà Dwight Moody, mwashi munène, wa Cilongelu cyà Bible cyà Moody. Ki mèmè kudyàmbedila ne: “Bu Dwight Moody mwà kutàngila pa Cilongelu cyà Bible eci; cìvwà muntu awu ùtwa nyama ku mikòlò aci, ne cìdìbo bènza mpindyewu aci’s!”

<sup>75</sup> Èè, mèmè kwamba ne: “Tàngilà kùneeku, tàngilà, ambà tũng bu—ambà tũng bu Wesley, Calvin, Knox, Finney, Sankey, anyi Finney, yònsò wa kùdìbo, mufwànyine kujuuka leelù ewu, ne kumòna èkèleeziyà wabò mwaba ùkaadiye!” Kaa, ekèlekèlè! Nwamònu’s, mu cipungu cyà kumpàla, pàdi muntu awu mwimàne mwaba awu, yèyè ngudì mukwàte Bulelèlè.

<sup>76</sup> Tàngilàayi Ngàngàbukà Dowie mu Zion City mwàmwa, mòna’s, leelù ewu’s, bàdi bàseka dyondopa dyà kùdì Nzambi baditàngile mu mpàlà, apu mpàvwà ci—cimenga cishindàmèenapù. Kàdi pààkafwà Dowie, ke pashìshe kulwakù citùdi. . . Blake, John Lake ne bakwàbò bônso abu. Pashìshe, katanci aka anyi, ùdi wènda wàlabala mpindyewu too ne mùdì Assemblées de Dieu mubwelèmu, ne musumbà munène wà tuubintu ne bikwàbò byònsò. Ne èkèleeziyà awu—awu ùkaadi muyè ne mutwè cìmpingà, ne ùsanganyiibwa mu ngiikàdilù mubi be.

<sup>77</sup> Ki mèmè kusangana eci ne, Bible mmwambè ne: “Davidi wàkakwàcila Mukalenge mudimu bìmpè mu lukòngò lwèndè.”

<sup>78</sup> Ki mèmè kwamba ne: “Mukalenge, ncyèna muswè bulongolodi nànsha bùmwe to. Swàkù nKukwàcìlèku mudimu ne mwoyi wànyì wònsò, pàndì mwaba ewu ne mwoyi apa.” Ncyà bushùwà. “Pashìshe, Wèwè newikalè ne muntu mukwàbò pangìkalè mumane kuya. Newikalè ne muntu kampànda wangata kaaba kààci.” Kwàjikì.

<sup>79</sup> Kùteeci bwà kwibakila pa cintu kampànda cikwàbò to. Kwèna mwà kuteemeshila mudilu mu mwaba ùmwèùmwe awu to. Bìvwà bikèngela bwà Izalèlèlè àtungunukè ne lwendu. Pàvwàbo bìimana, bàvwà bàtwa cìmpingà. Bìvwà bikèngela kutungunukabò ne lwendu dilòlò dyònsò; kuteemesha mudilu mupyamùpyà dilòlò dyònsò; bàtùngùnùke ànu ne lwendu. Nènku ke cìdì cìkèngela bwà twètù kwenza ncyòci aci. Cìvwà Luther naaci cìvwà cìmpè; cìvwà mbwà ditùkù dyà Luther. Cìvwà Wesley naaci aci cìvwà cìmpè; cìvwà nditùkù dyà Wesley.

Civwà cijila naaci, civwa cîmpè; civwa nditùkù dyàbò. Tudi ne mwoyi mu ditùkù dikwàbò. Mpindyewu tudi—tudi tutungunuka. Nènku kwòkò ditùkù paanyimà pèètù, nedilwe ànu mûshindù ùmwèùmwe. Kàdi twèndelàayi mu Bukènkè pàcidì Bukènkè bwikàlekù mwab'ewu.

<sup>80</sup> Mpindyewu, ne ndi mmòna eci, ne, mwômò amu ke mùdi dilongesha edi dishààla, katanci aka anyi, too ne mwàkalwàci kukòsoloka mu musùmbà wà tusùmbu, pashiishe beena Loomò kukùdimunabo mucìma. Mpindyewu, bukalenge bwalàbàle bwà beena Loomò, kacya ku matùkù àvwà—àvwà Loomò mucimùne dyàmbedi ne mutàmbe buloba bwà bàà Bisàmbà byà bendè kuumukila mu Grèce mwàmwa awu, paanyimà pàà dikùluka dyà Alexandre Legrand, bùvwa nditùngà divwà dikòokèsha buloba; beena Loomo, cikondo cyà bàà Bisàmbà byà bendè. Danyèlè ngudi mwàmbe nànkù, mu cikèènà-kumòna. Netùfikèku, mu—mu tusunsa tukesè emu. Kàdi citu misangu yònsò ànu ne bukòlè bukòokeshi pa buloba; beena Loomò.

<sup>81</sup> Ne pashiishe twètù kujandula mwaba awu, díbà adi ne, bààkavwija èkèleeziyà bulongolodi kampànda. Musùmbà wà bantu bààkadisangisha, twipacila ku cidimu cyà 606, kàdi kudibìikilabò bòbò biinè ne: “baataatù bàà ku cibangidilu,” baataatù bàà èkèleeziyà. Misùmbà yà bantu yàkadikungwija pàmwe ne kwenzayi mpungilu wa cidibo ne cyà kwenza, ke kujuulabò bulongolodi.

<sup>82</sup> Nènku lekèlaayi ngààkulèku kaaba aka, nwènù balundà bàànyi beena Kilistò bananga, bònsò beena Mishòònyi ne beena Kàtòlikè. Nènku mpindyewu, ndi ngèèla meeji ne ndi ne balundà bàànyi beena Kàtòlikè basòmbe kaaba aka; ncyèna ngàmbe eci bwà kunùtapa ku mwoyi to. Bwalu, anji indilàayi ndambù wa tusunsa, ne netùbweje Branham Tabernacle mu cyòci aci kàbidì, nwamònu's, indilàayi katanci. Bìdi bikèngela ànu twètù kuyiisha Èvànjeeliyò ànu mùdiYe mutèekiibwe mwaba ewu emu. Nànsha bàmbà ne mpenyi. . . Yone wàkamba ne: “Cisuuyi nciètèeka kwìnshì kwà muji wà mucì,” bipàtù byà mucì bitupikè biye kwònsò kùdibi biswè kuya aku. Ncyà bushùwà. Ùdi ne cyà kukòsa micì ne bikwàbò.

<sup>83</sup> Kàdi, tàngilàayi, mwômò amu ki mwàkavwijàbo èkèleeziyà wa kumpàla awu bulongolodi. Ki kudìsangishabò pàmwe ne kuvwijabò èkèleeziyà wa kumpàla awu bulongolodi, uvwabò bàbìikila ne ng'èkèleeziyà wa buloba bujimà awu, anyi èkèleeziyà wa Kàtòlikè mu Loomò. Ne mwena Kàtòlikè ùdi wàmbe ne yèyè ki “èkèleeziyà maamù.” Nènku aci's mbulelèlè bwà menemene. Ng'èkèleeziyà mamwèndè wa bulongolodi. Menemene. Mmusangu wà kumpàla, mu maalù-malonda ònsò à pa buloba, uvwakù èkèleeziyà kampànda mudìlongòlòle; kacya kàvwakù mulongolola, kacya ku kabundubundu kàà cikondo aku to.

<sup>84</sup> Mu matùkù à Izalèlèlè, kabàvwa—kabàvwa bulongolodi to. Bàvwa cisà, kí mbulongolodi to. Nènkù bóbò. . . Yesù Kilistò kààkavwijakù èkèleeziyà kampànda bulongolodi to. Nànsha umwe wa ku bàpostòlò kaakavwijaku èkèleeziyà bulongolodi to. Nènkù kakwènakù cikondo kwambwila ànu kwònsò aku, paanyimà pàà nkòngo yisàtù anyì yìnaayi paanyimà pààbò, cyàkenzàbò èkèleeziyà bulongolopdi nànsha. Ndi muswè bwà nwènù kulwa ne bwalu bulonda abu ne kufunkuna munu pa. . . Ndeejayyì mwaba ùdibu. Nènkù mémè nkààdikù mubalè Josephùs ne bafùndi bàà maalu-malonda bwònsò bàà batàmbe kwikala bàà pabwàbò batùkaadiku naabò pa buloba leelù ewu, bándi mumanyè, bwalu ndi ne cyà kwikala mutwishùbwe. Ndi ngàmba díyì edi kumpàla kwà binunu byà bantu; bikèngela wikalè mukùmbàne mwà kutwà nyama ku mikòlò ne kujaadika cyùdì wamba aci. Ncyà bushùwà. Kacya kakùvwakù bulongolodi to. Ne kakùyì. . .

<sup>85</sup> Ne Peetèlò Munsantu kààkiibakakù èkèleeziyà wa Kàtòlikè to. Ndi muswè bwalu-bulonda bùmwepelè, anyì citùpà cimwè cyà Mifùndu. Peetèlò Munsantu ùvwa muntu musèlàngàne. Nwènù kwamba ne yèyè ùvwa paapà. Yèyè kàvwakù mwà kwikala paapà to. Peetèlò ùvwa muntu musèlàngàne. Bible mmwambè ne: “Mamwèndè wa mukàjèndè ùvwa mulààle ùsaama mubidi kapyà—kapyà, ne Yesù kumwondopayè.” Ne bwà ku dyànyì dimanya, Peetèlò Munsantu kacya kàvwakù ùsanganyibwa mu Loomò to. Ne kakwènakù bwalu-bulonda bùkaadiku buleejè ne yèyè ùvwa mu Loomò to. Ne aci ntùpàkànyì.

<sup>86</sup> Nènkù bàkenza bulongolodi ne kukùngwija èkèleeziyà kaaba kàmwè ne kumubiikila èkèleeziyà wa buloba bujimà. Ki kwàkenzelàbò disambila dyà buloba bujimà. Bàvwa ne dyumvwangana dipwàngàne; bìvwa bikèngela bwà bantu bwònsò kwikalabo pàmwè, muntu ne muntu àmbè cintu cimwècimwè aci. Disambila dìmweùmwe adi dìvwa dyambiibwe.

<sup>87</sup> Ne bàkenza musùmbà wà Mifùndu, bayangàcile mu Bible, yàbùngì yà kùdiyi, e kwenzabò mikwàbò. Kakwènakù mpurgatoriyo mutèediibwe mu Mikànda yònsò yà cijila yà mu Bible to; kamwèna “mwoyo Màriyà to,” cintu nànsha cimwè cyà mùshindù awu. Cìtu misangu yònsò ànu cibèngàngàne, cìcilwishà, myaba yònsò mu Mifùndu. Kàcìvwakù nànsha, ní mmu cikondo kaayi cyònsò. Nènkù wèwè mupetè mwaba kampànda, udi ne dyèsè dyà kulwa màalabà dilòlò ne kundongolola. Kacyènamù to, mwaba nànsha wùmwe; twàla nsaserdòsè webè anyì mpaasàtà. Kakwèna kaaba nànsha kàmwè, munda mwà Mifùndu, ùdici citèediibwe.

<sup>88</sup> Mukàndà wùmwepelè mukesè, wà ba-Maccabées, wùvwà musàkidila mu Wòwò ewu, wùdì kawùyì musònsòdiibwe awu; bintu bìvwà bitèekiibwe mu Wòwò ewu, anyì byumùshiibwe



mu Wówò ewu. Bible *ewu* ke Umwèpelè udikù. Kùdì... mbaMwitàbe kùdì bajuudi bàà ku cibangidilu, anyì kùdì yònsò wa ku balongi bàà maalu-malonda bàà èkèleeziyà wa ku cibangidilu abu, anyì cikondo kanà cyònsò cyà beena Yudà bàà ba-Orthodoxes abu, ne kabààkiitabakù cintu nansha cimwè nànsha to ànu Bible utùdì nendè leelù ewu ewu.

<sup>89</sup> Mpindyewu, díbà adi, mu cyòci aci, tèelejàayi ne ntèmà mpindyewu. Mpindyewu nudi nwela meeji ne beena Kàtòlikè bàdi munkaci mwà kushàala cishiipwidi anyi? Indilaayi kakesè, nwamònu's.

<sup>90</sup> Mpindyewu, pashiishe kuvwijabò èkèleeziyà wa Kàtòlikè bulongolodi, ki kubangabò dikèngeshangana, bwà bààmònakù mwà... Bìwwa bikèngela bwà nwènù kuvwija muntu yònsò, myaba yònsò, èkèleeziyà ne mbùlámàtadi, bidisange pàmwè, ne kubwejamù kuumukila ku Loomò wa cimpànganù too ne ku Loomò wa ciipaapà. Mu ngaakwilù mukwàbò, kuumukila ku diitabuuja dyà majimbu dyà cimpàngaanù, bàakàtèèka bwena Kilistò mu mmwènekulu wabò bóbò. Nwamònu anyi? Kabàvwa mwà kuumvwa ne mbwà cinyi muntu awu ùvwa mufwànyine kwimana bwà kusambila kumpàla kakùyì cintu nànsha cimwè to. Bàvwa bampàngaanù, pa nànkù kuumushabò ànu Venus ne kubàndishabò Màriyà; kuumushabò Jupiter, kubàndishabò Peetèlo; lupìngù lwà mùshindù kampànda lwà kukuukwila. Mpindyewu, nènku bàvwa bàkuukwila kumpàla kwà cyòci aci. Ne bàakenza disambila dyà buloba bujimà, bàdyàmba mu Latin ne kadifwànyinyikù mwà kupangila to, ne bikwàbò, bàvwa bafwànyine kwamba misangu yònsò ànu byà mwomùmwe.

<sup>91</sup> Nènku kanwèna mwà kukòkangana ànyì kwenza muyiiki wà dikòkangana ne nsaserdòsè wa Kàtòlikè, anyì udi kàyì mwena Kàtòlikè, bashindàmèène pa Bible to.

<sup>92</sup> Umwe ùvwa musòmbe, nsaserdòsè wa citende ewu lwà kwìnshì eku, musòmbe mu nzùbù mwànyì emu ànu àbìdì àdì panshì aa. Yèyè ne: “Nwènù beena Mishòònyì, nudi nubala Bible ne nushàala kumbèlu. Twètù beena Kàtòlikè tutu tuya mu èkèleeziyà ne tukuukwila.”

Mèmè kwamba ne: “Kàdi ncinyi? S'ki cyòci aci. Mpindyewu anji ngandàmùnèku aci's.”

Yèyè ne: “Nzambi ùdi mu èkèleeziyà Wendè.”

<sup>93</sup> Mèmè ne: “Yèyè... Katòba kàà mu Mifundu nànsha kakesè kakèènakù kàmba nànkù to.” Mèmè ne: “Nzambi ùdi mu Dìyì Dyèndè. Mmwamba ne: ‘Dìyì dyà muntu yònsò diikalè mashimi, kàdi Dyànyì dilelèlà.’”

<sup>94</sup> Yèyè ne: “Kwènakù wela meeji ne kasumbu kajimà kàà bantu, kènza cisangilu pàmwè, nkafwànyine kwikala ne bukòokeshi bwàbùngi kutàmba ànu muntu umwe anyi?”

95 Mémè ne: “To. Muntu umwèpelè awu yèyè mwikàle mu diswa dyà Nzambi, yèyè ùdi ne Bulelèlà.” Cìtu misangu yònsò ànu cijaadikiibwe’s.

96 Bu mùvwà Yèhoshàfàtà ne Miikà, màleesònà atùvwà bayìle ditùkù adi awu’s, dyàlumingu dyàshààdi edi, pààkayà Miikà kuntwaku. Ne bayiishi nkàmà yìnaayi biimàne, bàmba ne: “Bàndaaku! Mukalenge ùdi neebè. Bàndaaku! Mukalenge ùdi neebè.”

Yèhoshàfàtà kwambayè ne: “Kakwènakù mukwàbò kaaba aka anyi?”

Yèyè ne: “Kùdi Miikà, kàdi mémè ntu mumukine.”

Yèyè ne: “Twànji kuumvwabi cidiye wamba aci.”

Kwambayè ne: “Bàndaaku, kàdi ndi mumòne Izalèèlà mutangalaja bu mikòòkò.”

Yèyè ne: “Ncìvwa mukwambile anyi?” Wamònu anyi?

97 Pa nànkù, nganyì uvwa mubingè, mwaba awu? Pàvwà baprófetà nkàmà yìnaayi balongèshiiibwe biimàne kumpàla kwà muntu awu, ne nànsha nànkù ne munsantu mukèsè mubùnguluki wa mu malaba muvwàle biteetela mwimàne lwà paanyimà pààpa ùvwa ne bulelèlà. Ncyà bushùwà. Mbulelèlà. Ùvwa naabò. Ùvwa ne bulelèlà. Wàkabàngudiibwa dipi mu mbàngà ne kutuciibwayè, bwà bwalu abu, kàdi ùvwa ne bulelèlà.

98 Pa nànkù kabyèna ne bwalu bwà búngì bwà bàdi bàmba *cikampànda*, anyi ní mbanganyì bàdi bàmba *cikansanga*, ncìdì EMU MMÙDÌ MUKALENGÈ WÀMBA. Mbulelèlà. Nebikèngele bwà wèwè kwikala mwimàne pàà nkààyebè, misangu yàbùngì, paùdi utwà ku cyà Dìyì dyà Nzambi, kàdi ikàlà mutwishiiibwe bwà kutwà cìdì Mukalenge mwàmbè nyama ku mikòlò.

99 Mpindyewu, bààkavwija èkèleeziyà ewu bulongolodi, mubidi munène, èkèleeziyà wa Kàtòlikè, udi ne bwenzeji pa ntèndeleeleu yònsò, leelù ewu, mu cipaapu cyà beena Kilistò, mbwena Kàtòlikè. Kàdi bòbò bàdi bàmba ne: “Kwèna dijinga ne... Katwèna...”

100 Wèwè udi wamba ne: “Nkwèpi kunùdì nupetela byà ne ‘kanùdì munyiinyi abi’? Mpenyi panùdì nupetela byà ne ‘nsaserdòsè kàsèdi to abi’? Mpenyi panùdì nupetela cyòci eci’s?”

101 Yèyè ne: “Katwèna tulongesha Bible to.” Yèyè ne: “Èkèleeziyà’s ke dīyì. Cìdì Bible wamba nànsha ciikàle cinyi; ncìdì èkèleeziyà wamba cìdì ne bwalu.”

102 Kàdi Nzambi wàkamba ne: “Dīyì dyà muntu yònsò diikalè mashimi, kàdi Dyànyì diikalè dilelèlà.” Mpindyewu bikèngela wèwè kwenza disungula dyèbè.

103 Mpindyewu, bwena Nikàlàwù abu bwàkalwa dilongesha, ne pashiishe kulwabù dikèngeshiiibwa. Mpindyewu, ki cyòci cìdì cipàtukà apa mu matùkù à ndekeelu eci. Pashiishe

kulwakù mwaba wà mâyi mu cipèèlà, munda mwà bikondo byà mîdimà ne dikèngeshiibwa; pashiishe kulwakù dijuuka, mu dilongolola dyà kumpàla, divwà Martin Luther. Martin Luther wàkatontolola èkèleeziyà wa Kàtòlikè, bwalu bwà wàkapàtukamù ne wàkangata mèèsà à Mukalenge awu. . .

Ki bòbò kwamba ne: “Eci mmubidi wà Kilistò.”

104 Yèyè kwamba ne: “Kí mmubidi wà Kilistò to. Ncyostiyà. Ki cyònsò cidìci ncyòci aci.”

105 Bàdi bìitabuujja ne ng’ukàristiyà munsantu, ne: “*Ukàristiyà munsantu* ùdi ùmvwiya ne ‘Nyumà Mwímpè.’ Nènku paùdi wangata aci, udi wangata Nyumà Mwímpè mu mubidi wèbè.” Kàdi aci’s ncyà mafi.

Nyumà Mwímpè ndibàtiiza dyà Nyumà.

106 Kabyèna ne: “Pààkakùmbanà Ditùkù dyà Mpenta, nsaserdòse kampànda kulwayè ne kubàpèèshayè ukàristiyà, cyostiyà kampànda pa ludimì lwàbò to.” Anyi to ne: “Muyiishi kampànda kujjuukayè e kubàmyaminayè mâyi, ne kubàlabulayè ku cyanza,” ní ng’eci anyi ckwàbò to. To, mukalenge.

107 “Kàdi kwàkalwa cyonà cìfùmina mu dyulu cyenzè bu cipeepèlè cicolè cyà cìvuma, cyàkuujà nzùbu mujimà mùvwàbo basòmbèlè.” Aci’s ke Mufundu. S’ke cidì cyà bushùwà. Ke cyàkenzekà mu Èkèleeziyà awu ncyòci aci, ne ke cidì cyenzèke pàdi Bukènkè bùkenkeshà mu ditùkù edi. Ke mwaba wàkapàtukila Bukènkè kuntwaku; ne mwab’ewu ke mwaba ùdi Bukènkè bùpàtukila ewu.

108 Mpindyewu byòbì byenzè ne Mifundu kanà yònsò yîndi ntèèla ayi, mmyèdiibwe mpatà, yitèekaayi ànu pa. . . Nènnùpèèshè mwaba wùdiyì yisanganyiiibwa, nwamònu’s, mu Mifundu. Èyo. Mu bushùwà bwà bwalu, mu katanci kakesè cyanààna mùshindù ewu. . . Pa ciibidilu, patùdi tukèbululaMù, tudi twangata mbingu ne ngondo. Ànu Mufundu wònsò, kuwùbala kubangila kuulu too ne kwinsì, kwenza ne bantu bìikalè ne Bible yàbò. Kàdi, Wòwù mwediibwe mpatà, mmanyishaayi ànu cyanààna. Bímpè.

109 Pashiishe, Martin Luther. Pashiishe, paanyimà pàà Martin Luther, kulwakù John Wesley.

110 Martin Luther wàkapàtuka ne kàtèshismù, ne bintu bùngì cyanààna. Wàkapàtuka ne dibàtiiza, wàkapàtuka ùfila búsàtù, dibàtiiza dyà búsàtù cìvwà kacya kacyi cìlongèshiibwe mu Bible to, kacyi kacya cìlongèshiibwe mu Bible nànsha. Kacya kakùvwakù muntu nànsha umwèpelè wàkabàtijiibwa mu dibàtiiza dyà búsàtù bwà Nzambi, mu Bible nànsha. Byòbì nànkù, lwàku ùndeeje mwaba wùdici. Kacyenamù to.

111 Mùshindù wùmwèpelè wàkatùmiibwàbo ne mudimu bwà kubàtijiibwàbò, wùvwa wà ne: “Ndàayi nùkalongèshè bàà mu matungà ònsò,” Yèyè wàkamba kalè wàwa ne:

“nubàbàtiizè mu Dîna,” kî mmu dîna to, “mu Dîna; Taatù, Mwàna, Nyumà Mwîmpè.” Ki bayiidi kukùdimukabò e kubàtiiza bantu bônso mu Dîna dyà “Yesù Kilstò,” nènku, bàakapèèshibwa mudimu wà ne muntu kanà yónso udi mubàtijiibwe mu mùshindù mukwàbò kampànda, bìvwa bikèngela bwà kulwayè ne kubàtijiiludiibwayè kumpàlà kwà kumònaye mwà kupeta Nyumà Mwîmpè. Kàdi ke èkèleeziyà wa Kàtòlikè kupàtukayè. . .

<sup>112</sup> Lèèjà kaaba kàmwè mu Bible mwaba wùkaadiku muntu nànsha umwe mubàtijiibwe mu dîna dyà “Taatu, Mwàna, Nyumà Mwîmpè.” Mmutupù ànu mwètù emu’s, kî mmómò anyi? Disambombò dilòlò ndilòlò dyà nkonko, nenyipetè, netufikè ku diyòlola. Mbîmpè. Èyo. Ndi muswè muntu kanà yónso udi mwà kundeeja mwaba wùkaadiku muntu nànsha umwe mubàtijiibwe mu dîna dyà “Taatu, Mwàna, Nyumà Mwîmpè,” nèngùumuke mu cyambilu ngàmbe ne ndi mwena lubombo. Nènku muntu kanà yónso ewu uvwa mubàtijiibwe mu mungà mùshindù, bìvwa bikèngela àlwe ne àbàtijiiludiibwè cyàkàbidi mu Dîna dyà “Yesù Kilstò,” bwà kupeta Nyumà Mwîmpè. Ki cyòci aci menemene. Ki cidi Bible mwàmbe.

<sup>113</sup> Mpindyewu, nudi numòna’s, twètù tudi twangata dilongesha dikwàtakaja pamutù pàa Bulelèlè. Mpindyewu tàngilàayi Mufùndu. Kwàmbe, ne: “Èè, Mwanètù Branham mmwambè to.” Tàngilàayi Mifùndu ayi mpindyewu. Angàtaayi mukànda wènù wà cikèbelu ne nucikenkètè. Nènku dîbà adi panùdi ànu. . .

<sup>114</sup> Nudi numòna’s, cyònsò cyà ku bikondo byà èkèleeziyà abi civwa ne Dîna Dyèndè, too ne mwàkopicilàci mu cikondo cyà èkèleeziyà cyà mîdimà eci.

<sup>115</sup> Nènku, tàngilàayi, mùdi aci cilèèja cimfwànyi kuntwaku mu—mu èkèleeziyà wa ba-Orthodoxes. Pàakalwà cikondo citàmbe kwikala cyà mîdimà menemene aci, cyà beena Yudà, ncikondo civwà Aakaba, mu luumù paanyimà—paanyimà pàa mfùmù munènè uvwa kumpàla kwèndè; nènku kumpàla kwà cyòci aci, Izàlèlèlè wàkadi mu ngiikàdilù mulengèle. Ki Aakabà kubwelayè mu mwena kwitabuuya wa ku mikàlù, ngiikàdilù wa civùmùvù, ne kuyayè kasela mwàna wa mfùmù mukesè wa bakàji ewu, Yezàbèlè, uvwa mukuukwidi wa mpingu, ne kumubwejayè, ne kubwejayè dikuukwila dyà mpingu mu Izàlèlèlè. Kanwènaayikù bavùlùke aci anyi? Cifwànyikijilu cilenga cyà dikèma.

<sup>116</sup> Pàakasèlanganà cyena Mishònyì ne cyena Loomò, bàakabweja cyàkàbidi dikuukwila dyà mpìngù mu bwena Kilstò, mu cikondo cyà mîdimà; menemene—menemene, bilondèshile maalu à buloba.

<sup>117</sup> Mpindyewu tàngilàayi pàdici cipàtuka ku elu luseke. Apa nudi ne cinyi? Mupinganyi wa Nyumà Mwîmpè; cyostiya. Mupinganyi bwà dibàtiiza dyà mu màyi mu Dîna dyà Yesù

Kilistò; Taatù, Mwânà, Nyumà Mwîmpè. Mbafile mipinganyi yà bintu byònsò. Ndi mwà kwangata ne kujaadika ku Mifundu; mupinganyi ku mupinganyi.

118 Ki Martin Luther kucitabayè. John Wesley wàkalwa pèndè ànu ne cintu cìmwècìmwè aci, ne kucitabayè. Kacya kakùvwakù muntu nànsha umwe, mu Bible, ukàadikù mummyaminàngàne màyi nànsha. Kacya kakùvwakù cintu bu nànkù to. Kakùvwakù cintu bu nànkù mu Bible nànsha, kakùvwà mudimu mutùmangana naawù anyi díyi ditùmà bwà cyòci aci nànsha kakesè, kàdi nwènu nwàkanyisha bwà kwenzekaci. Ncyà bushùwà. Nwàkanyisha bwà kwenzekaci. Bâpâtuka bàkangata kâlàngì kakesè kàà mukèlè aku ne bàkumyaminawù. Bwà cinyi? Èkèleeziyà wa Kàtòlikè ke wàkacitwàdija, ne nwènu kuciinamina. Mmwómò.

119 Muntu kampànda ùvwa wàmba, dîngà ditùkù, wàmba ne: “Kwèna . . . Wèwè, kwèna ànu mwena Kàtòlikè to. Udi . . .”

120 Mémè ne: “To, mwanètù. Mémè’s ndi mwena Mishòònyi. S’ndi ntontolola cintu aci.” Ncyà bushùwà. Mémè bu mwambi wa Èvànjeeliyò, mwikàle ne bàna bàà Nzambì bu bàànyi bàdi bàntwa paanyimà kaaba aka, bwà Dyulu, ne nêngiikalè ne cyà kubàyiisha ne kusòmba kumpàlà kwàbò bu mulongeshi ne bimanyinu ne maalu à kukèma, mvwa mwà kwikala mwena lubombo bu mémè ncyi ntwà cìdi bulelèlè nyama ku mikòlò to. Mémè kwamba ne: “Èyowà’s, mukalenge. Nêngiimanè, ní bìdi binshebeya. Nêngiikalè mwà kucyènza. Nè—nèndongeshè ànu cìdi Bible aci.”

121 Nènku ndi muswè, pa dîbà kanà dyònsò, bwà kukòkanganaPù ne muntu kanà yònsò, nwamònu’s; nànsha yèye mwikàle paapà wa ku Loomò, anyi mwèpiskòpò mutàmbidìle, anyi cyònsò cidiye aci. Nwamònu anyi? Èyowà’s, mukalenge. Ncyà bushùwà. Mémè mupiiile, lwà ùndeejè. Mpindyewu, ncyèna mupiiile to, bwalu ndi ntèela Mifundu. Wèwè . . . Ncyàkwangata mukàndà wèbè wà kubala awu to. Eci’s ke Mukàndà wà kubala, ùdi *apa* ewu.

122 Mpindyewu, dîbà adi, nudi numòna’s, bààkabanga kupàtuka ne bintu byònsò byà mmwènekèlu wa kwìsùkwìsù ebi.

Mpindyewu, mu matùkù à ndekeelu, nekùlwe dikèngeshiibwa.

123 Mpindyewu tudi, lwà mu, Bwàkabuulwibwà nshapità wa 13 mpindyewu, cyà kumpàla. Mpindyewu bu nwènu mwà kumòna, kwìnshì kwà nshapità eku, mmwambè ne: “Mémè kutàngila, ne mònaayi, Mwânà wa mùkòòkò mwimàne pa mukùnà wà Sinàayi. . .” To, numfwilàayikù luse, ndi mu mvensà wa cyanàànà, nshapità wa cyanàànà, wa 14. Nshapità wa 13:

*. . . Ngàkiimana pa lusenga lwà ku mbù, ne kumòna nyama wa lwonji ùpàtukila mu mbù, mwikàle ne mitù mwandamutekète ne nsèngù dikùmi, ne pa nsèngù apu*

*bifulu byà butùmbi dikumi, ne pa—pa mitù yèndè apu  
dìna dyà dìpenda dyà Nzambi.*

<sup>124</sup> *Dipenda dyà Nzambi ncinyi? Cìdì “kwelulwila, kupwekesha milongo, kwakula bwà.” Mpindyewu tàngilàayi, úvwa ne “mitù mwandamutekète, nsèngu dikumi.” Nèngu mpindyewu tàngilàayi dibà didiye “ùpátuka mu mbù.” Mpindyewu Bwàkabuulwibwà 17, nwènù bàdì bàcifùnda abu, 17.15, mmwambè ne—ne máyi àdi àleeja “mupimbu ne misùmbà yà bantu.” Pa nàнку nyama wa lwonji ewu ùdi ùleeja “bukolè, bukolè bùdì kabiyi bùneemeka Nzambi nànsha.” “Nyama wa lwonji mudyànganyi wàkapátuka mu bantu awu, ne yèye wàkiimana pa nsenga yà ku mbù. Ki mèmè kumòna nyama wa lwonji awu. . .”*

*Ne nyama wa lonji úmvwà mumòne awu úvwa bu. . . nkàshààmà, . . . makàsà èndè àvwa makàsà à outs, . . . mukana mwèndè. . . mukana mwà nyama wa ntambwe: ne dragon wàkamupèsha bukolè bwèndè, ne . . . nkwasa, ne bukòòkeshi bunène.*

<sup>125</sup> “Dragon!” Tudi ne bintu bibìdì byà kutàbàleela mpindyewu. Tàngilàayi nyama wa lwonji ewu. Úvwa ne ngiikàdìlù yìnaayi mishiilàngàne munda mwèndè.

<sup>126</sup> Nèngu bu nwènù mwà kwangata Danyèlè 7, nwènù bàdì munkaci mwà kubifùnda abu, Danyèlè 7. Danyèlè wàkamòna cikèènà—kumòna cimwècimwè aci, bidimu nkàmà mwandamukùlù kumpàlà kwà cyòci eci, wàkamòna cikèènà—kumòna aci. Yèye wàkamòna nyama yà lwonji ayi, mitàpùlùke, ewu ne mukwàbò, ku cibangidilu cyà bukòòkeshi bwà bàà Bisàmbà byà bendè.

<sup>127</sup> Nèngu’s ki yòyi eyi, Yone wàkayimòna, ne ndekeelu wa bukòòkeshi bwà bàà Bisàmbà byà bendè, nyama yònsò yìnaayi ayi yìvwa mileejìbwe mu umwèpelè. Démons yìmwèyìmwè yà kale ayi, démons yàkakwàta bukalenge ne bukalenge bwònsò bwà beena Loomò ayi, too ne ku ndekeelu ayi, ne beena Ngelikà abu, ne bikwàbò, too ne mu cipungu cyònsò cyà bàà Bisàmbà byà bendè, mbilwè kubwela ne byònsò bidisange mu nyama umwèpelè wa lwonji. Netùmusanganè, dyàkàmwè, bwà tùmònè ne yèye ùdi nganyi. Cyà bushùwà. Yònsò ayi, nkàshààmà, ntambwe, byònsò abi, dragon awu. Mbanganyi bàdì bamanyè cìdì dragon awu? *Dragon* ùdi ùleeja “Loomò.” Èyowà.

<sup>128</sup> Tùci—tùcibalàayibi. Cyòci aci, kí cinùdì bu bàdì bàdikonka mu meeji. Mpèèshaayi Bwàkabuulwibwà nshapità wa 12, katancì kakesè cyanàànà kaaba aka. Tùtàngilàayi apa, Bwàkabuulwibwà 12. Mpindyewu tàngilàayi.

*Ne kwàkamwènèka bwalu bwà kukèma bunène mu dyulu; mukàji kampànda. . .*

129 Muntu *mukaji* ùdi ùleeja cinyi? “Èkèleeziyà.” Ewu ki—ewu ki mukàji—musèla udi apa ewu. Ewu ng’èkèleeziyà, èkèleeziyà mulelèlà.

*... mukàji muvwàle dībà, ne ngondo mwinshì mwà makàsà èndè, ...*

130 Tàngilàayi, ngondo mwinshì mwèndè mwà... “Dībà ku mutù kwèndè, ngondo mwinshì mwà makàsà èndè.” *Dībà* divwa “cipungu cyà ngàsà.” Ne *ngondo* ùvwa “cipungu cyà mikenji.” *Mukàji* awu ùvwa èkèleeziyà wa “ba-Orthodoxes,” ne ùvwa mwimànyine pa mikenji. Mikenji yivwa munkaci mwà kupita, bwalu mikenji yivwa mundidimbì wà bintu bimpè bicivwà bilwa. Ncyà bushùwà anyi? Ngondo ùdi ànu mundidimbì cyanààna, wà dībà dīdileejila mu ngondo (mmwômò anyi?), wènza ngondo. Ne mikenji yivwa mwinshì mwà makàsà èndè; yéyè ùkaavwa mumanè kwikala ne mwoyi mu ditùkù adi. Nènku mōnaayi mùvwàye muvwàle kaaba aka mpindyewu.

*... ne mwinshì mwà makàsà èndè, ne pa mutù wèndè cifulu cyà butumbi cyà mitootò dikumi ne yibidì: (Èkèleeziyà mmwashiiibwe cifulu cyà butumbi ne Dilongesha dyà bàpostòlò dikumi ne bàbidì, nwamònu’s.)*

*Nènku yéyè mwikàle ne difù ne kwelayè lubilà, ùdinyènga ne bisaamà byà pa lulèlu, ... wàkadinyènga bwà kulelayè. (Awu ùvwa èkèleeziyà wà Orthodexe. Tàngilàayi.)*

*Ne—ne kwàkamwènèka bukwàbò bwalu bwà kukèma mu dyulu; nènku mōnaayi dragon munène mukünze, mwikàle ne mitù mwandamutekète, ... (nwamònu’s, lamàayi mwandamutekète awu mu meeji mpindyewu, “mitù mwandamutekète,” misangu yònsò)... mitù mwandamutekète... nsèngu dikumi, ne bifulu byà butumbi mwandamutekète pa mitù yèndè.*

*Mpindyewu, ne mukilà wèndè wàkapulumuna cyàbisàtù cimwè cyà mitootò yà mu dyulu, ne wàkayikùpa pa buloba: ne dragon kwimanayè kumpalà kwà mukàji uvwa pabwipi ne kulela mwànà awu, bwà kudyàye mwanèndè pàdiye ànu ne wàledibù. (Tàngilàayi!)*

*Ki kulelayè mwànà wa balume, uvwa ne cyà kukòokèsha matunga ónsò ne dikombo dyà cyamù cifiike: ne mwànà awu kwangaciibwayè muulu kùdì Nzambi, ne ku nkwasà wèndè wa butumbi.*

131 Èkèleeziyà wa ba-Orthodoxes mwimàne mwaba awu; dībà dyà muulu dikenkesha; Dilongesha dyà bàpostòlò dikumi ne bàbidì. Eyo. Ne ngondo mwinshì mwà makàsà èndè, mikenji, mundidimbì wà bintu bicilwalwà; Bukènkè bwà Èvanjeeliyò

munkaci mwà kukenka mpindyewu, mikenji yàkafùbidila cikondo cyàkapàtukà Dìbà.

<sup>132</sup> “Wàkatàta bwà kulelayè, ne wàkalela Mwànà wa Balùme,” uvwa Kilistò Yesù, “ne Yèyè kwangaciibwa muulu kùdì Nzambi. Kàdi pàdì ànu . . .” S’ki cyôci eci. “Pàdì ànu dragon, uvwa dyabùlù awu, mumòne mukàjì awu pabwìpì bwà kulela, wàkiimana ànu ku luseke lwèndè bwà kudyàye Mwan’Èndè awu pàvwàYe ànu ùlediibwa.”

<sup>133</sup> Nèku pààkalediibwà Yesù, Bukalenge bwàlàbàle bwà beena Loomò abu bwàkeela mukenji, bwà kushebeya bàna bònso bàà kuumukila ku bidimu bìbìdì, too ne kwinshì, bwà kufika ku dishebeya Kilistò Yesù. Ki Nzambi kumubwikila cilàmbà pa mèsù èndè, ne kuya Nèndè mu Èjiipitù ne kuMusokoka, mwàkenzàYe ne Mòsà mùshindù ùmwèùmwè awu amu.

<sup>134</sup> Ki dragon mukùnze nyèyè awu, dyabùlù. Nkwasa wèndè ùdì penyi? Mu. . . Kì mmu Russie to; mu Loomò! Ki yèyè ne: “Dyabùlù mmumupèèshe nkwasa wèndè ne bukòòkeshi bwèndè, dragon mukùnze awu,” kì n’Russie to.

<sup>135</sup> Ndi ngumvwa bambi banène bàmba ne: “Beena Russie ke mufwilakanyi ne Kilistò.”

<sup>136</sup> Mòna’s, mwena Russie kèna ne cyà djenja ne mufwilakanyi ne Kilistò to. Awu’s n’communisme. Cyena Mishòònyì cyà mafi ne cyena Kàtòlikè mbipatule communisme. Cidì cyenze ne Russie mmubiipàte muntwamu, mbwalu bàvwa ne mfranga yònsò. Nèku bàvwa ne masambila ònsò menzela bansantu, nànkù kwibakabo nžùbu mitàmbe bunène, ne bàvwa ne mabanji ònsò à bantu, ne baàswika tusùmbu tusùmbu mùshindù awu. Ke kumònabò ne kabàvwa ne nsòmbelu mushiilàngàne to, ne kabàvwa bashiilàngànekù ne yònsò wa ku bakwàbò bàà pa buloba to, ke kucitwilabò e kwenzabò communisme.

<sup>137</sup> Mpindyewu bu nwènu mwà kumpèèshaku dilòlò dikwàbò kàbìdì, bu Nzambi mwà kwanyisha, nènùjaadikilè ne communisme ùdì munkaci mwà kukwàta mudimu buludi mu byanza byà Nzambi wa Bukolè bwònsò, bwà kubùtula cyà beena Loomò cim- . . . Nèku, vùlukàayi ne, ndi ngàmba nùnkù ewu bu mupròfetà wa Nzambi, bukalenge bwà beena Russie nebumacishe bombe bwà mùshindà bwà mùshindù kampànda pa Cimenga cyà Vatican bwà kucibùtula mu dìbà dìmwèpelè. EMU MMUDÌ MUKALENGÈ WÀMBA. Ne Bible mmwàmbè ne Nzambi wàkangata bantu bàà mwoyi wà lwonji abu ne wàkabàtèeka mu byanza Byèndè, ne bóbò bàvwa byamù byà mudimu mu byanza Byèndè, “bwà kuuja diswa Dyèndè,” ne bwà kumupingajila menemene eci civwà cimukùmbànyina. Aci ncyôci menemene. Aci’s n’Dìyì.

<sup>138</sup> Mwanèètù, kwena ànu ujingulula mùdì bintu ebi ne budimù to! Vùlukàayi ne, Yesù Kilistò mmwàmbè ne mufwilakanyi ne Kilistò neikalè mufwànàngàne menemene mu mùshindù wà



bifwànyine kuseeswisha ne basungula mene. Kwambayè ne: “Kanùlekedì muntu nànsha umwe ùnùseeswisha nànsha.” Yèyè ne: “Kanwikadi bu bampàngaanù nànsha, nwenza disambila dyènù adi nudyàmbulule ne: ‘Mwoyi Màriyà, udi mubènèshìibwe, mùle tètè ne ngàsà, ne babènèshìibwe ngaba bàdì. . .’” Kwambayè ne: “Kanwikadi bu bampànganù bàdì bàmbulula bintu byà cyanààna.” Yèyè ne: “Nènku kanùbìikidi muntu nànsha umwe ne ‘taatù’ to, pa buloba ebu nànsha, anyì, anyì ní. . . bu munùdì ne Taatù umwèpelè, ne ngudi mu Dyulu.”

<sup>139</sup> Kàdi nudi nucyùnguluka, nucilengulula, nucyènza nànsha byà munyi, bwalu ncyà mwasàkànaayi. Dyabùlù ùtu misangu yònsò ànu ne cintu cyà mwasàkànaayi. Ki mùtùbì misangu yònsò, kacya ànu ku cibangidilu aku: “mmwènekèlu wa ntèndeleeleu.” Kaayinà ùvwa ne cintu cimwècimwè aci. Nyumà wendè nyèyè ewu ùbwela buludì mwòmò emu, mu mufwilakanyi ne Kilistò; kàdi’s ke Abèlè ulwàlwa ewu, mushipìibwe awu, yèyè pèndè. Ncyà bushùwà. Mònaayi, nènku mpindyewu tàngilàayi.

<sup>140</sup> Nyama yà lwonji yònsò eyi, yà kale wàwa ayi, yìvwa yònsò mivùngila mu nyama umwèpelè lwà apa nùnkù, wàkabiikidiibwa ne “dragon mukünze awu,” dyabùlù awu.

Mpindyewu túbangilàayi ku mvensà wa 15 wa nshapità wa 13.

<sup>141</sup> Nudi numòna’s mpindyewu ne *Loomò* awu ùvwa—ùvwa “nkwasà wa Sàtaanà.” Nyama wa lwonji wa mitù mwandamutekète ne nsengu dikumi awu ùvwa mwimàne ku luseke lwà Mwànà awu, Mwànà Kilistò awu, bwà kuMudyà dyàkàmwè ànu pàvwàYe ùlediibwa. Wàkènza nànkù nganyì? Helòòdè, Loomò; ki citùku ànu misangu yònsò. Netùbwele mu Danyèlè, dyàkàmwè, patwikalà ne dìbà dikùmbàne, nènku bu Mukalenge mwà kutùkwàcishaku, nènku netùmonè.

<sup>142</sup> Bu mùdì myaba yònsò mu Mifùndu, kacya ànu ku cibangidilu cyà bàà Bisàmbà byà bendè, kwalukila buludì kubangila ku Genèsè, Ndi mwà kujaadika ne Baabùlòona wàkabangila mu Genèsè ne ùdì ùjikila mu Bwàkabuulwibwà. Wàkabangila kuntwaku ne Nimèlòode, mwànà wa Ham, ku dikuukwila dyà mpingu, bwà kubweja dikuukwila dyà mpingu, bwà kukuukwila mpìngù. Nènku ncilwè too ne ku ndekeelu, ne, ne budimu mu matùkù à ndekeelu mu mùshindù wà ne byàkangata too ne dìnà dyà bwena Kilistò, ne, cidì ànu, dikuukwila dyà mpìngu!

<sup>143</sup> Pòlò Munsantu munène awu, mu Tesàlònìkà Mwibìdì, kàakacyàmba anyì? Tùcibalàayi ànu cyanààna, kumpàlà kwà twètù kuya kule. Tesàlònìkà Mwibìdì, nshapità mwibìdì, bwà kumòna cìdì Pòlò mwàmbè kaaba aka. Yèyè wàkacimòna mene ne mu Nyumà, kumpàla mene kwà kulwaci kubwela mu ditùkù ditùdì ne mwoyi edi.

<sup>144</sup> Èè, ekèlekèle, mùshindù mene ùdì ditùkù ditùdì ne mwoyi edi’s, midimà mene yitùdì basòmbèlemù, ne balùme

ne bakàji munkaci mwà kudisanga mwab'ewu mu mîdimà yà cimpàngaanù ne kabàyi nànsha bacimanyè to. Byènza lu—byènza luse be! Mùshindù mene ùdi ditùkù didì . . .

<sup>145</sup> Pòlò wàkamba ne: “Ditùkù adi kadìvwa mwà kulwa to, ànu pìikalà dipàmbuka dilwè dyàmbedi, ne muntu wa mpèkaatù awu mubuulùdìibwe.” Mpindyewu tàngilàayi, yèyè ùdi ùmwamba ne mmuntu. Ncyà bushùwà anyi? Pòlò mmwâmbè ne: “Yèyè ùvwa muntu wa mpèkaatù, udi ukàndameena yèyè mwinè cyònsò cidì cibìikidiibwa ne n’Nzambì aci, pa nànkù ewu udibò bàkuukwila bu Nzambì.” Muntu, bàmuukwila bu Nzambì; muntu uvwa mwà kutèèkiibwa kaaba aka bu mmwènekeli wa dikuukwila. Ki yèyè kwamba ne: “Ditùkù adi kadìvwa mwà kulwa to pàvwà dipàmbuka kadiyi dyànji kulwa.” Ncinyi ciinè aci? Ngiikàdilù wa civùmvù wa èkèleeziyà. Èyo.

<sup>146</sup> Tèèlejàayi. Lekèlaayi nnùbadilèci, bu nwènù mwà kuswà, Tesàlònìkà Mwibìdi. Èyo. Bu mèmè mwà kupeta mwaba mujaalàme mpindyewu, wà kubangila, bwà katwikadi twàlwa kubala bintu byàbùngi menemene to. “Muntu nànsha umwe kànùseeswìshìku to,” mvensà mwi3, Tesàlònìkà Mwibìdi, nshapità mwi2.

*Muntu nànsha umwe kànùseeswìshìku to nànsha byà muniyi. bwalu ditùkù adi kadyàkulwa to, pàdìku kakùyi kwanji kulwa dipàmbuka dyàmbedi to, (Cikondo cyà Èkèleeziyà wa Laòdikiyà mpindyewu) . . .nènku muntu awu, (m-u-n-t-u, ku bùmwè) . . .muntu wa mpèkaatù musokòlòdìibwe, mwànà wa dibùtuka; (pamutù, pamutù pàà Mwànà wa Nzambì), mwànà wa dibùtuka;*

*Udi ukàndameena (yèyè mwinè) ne ùdìzànjika yèyè mwinè kumutù kwà cyònsò cidìbo bàbùkila ne n’Nzambì aci, bwà wàmòna mwà kukuukudiibwa bu Nzambì; bwà ne yèyè bu Nzambì wàsòmba mu ntempèlù wa Nzambì, ùdìleeja ne yèyè ùdi Nzambì. (Bìitaba ditonda!)*

<sup>147</sup> Kùngambìdiku to, wèwè mulundà wanyì mwena Kàtòlikè! Mmuniyi mùdìbi ne, wèwè udi wamba ne udi “witabè dibakà ànu òmùwèpelè; èkèleeziyà wa Kàtòlikè mmulamàte yèyè ànu ku dibakà òmùwèpelè.” Wèwè kùyi ne mfrangà to, bìdi ànu bìmpè. Kàdi lekèlaayi nkwambilè, ànu mwab'ewu mu cisàmbà cyànyì emu; nsongàakàji kampànda mmusòmbe kaaba aka mene, maamù musòmbe kaaba aka, ne papa, pèndè; ne mukàji mukwàbò mwab'ewu ne mwànà wa balùme mutèkète ewu. Mwànà wa bakàji awu wàkasèdiibwa kùdì nsongàalùmè wa beena Mishòonyi; kutàpulukabò ne kuyayè. Nànkù dìbà adi, katancì aka anyi, mwànà wa bakàji awu ùvwa ne cyà kusèdiibwa kùdì nsongàalùmè wa cyena Kàtòlikè; ne bìvwa bìkèngela bwà kuyayè kafuta mfranga yàbùngi, ne kwalukilayè, ne: “Yèyè kàvwa musèdiibwe kùdì nsongàalùmè wa beena Mishòonyi ewu

to, twamb'eku twamb'eku.” Howard ke yéyè ewu, cisambà cyànyì sungasunga . . .

<sup>148</sup> Èè, ànu lwà kuulu eku. . . Ncyàkutèèla dìnà to. Ùdi ne—ùdi ne mwànà wa bakàji, ne mwànà wa bakàji awu ùdi ne bidimu bitwè ku makùmi àbìdì ne bisambòmbò. Bàyendè, mukàji awu wàkamushiyà mu Milltown mwàmwa, ne wàkanyeema e kuya kasèdiibwa kùdì mulùme mwena Kàtòlikè. Kì mpindyewu kwambabò ne: “Bikèngela Àpatukè mu èkèleeziyà.” Pa nàнку bààkafuta mfrangà yàbùngì menemene, bwà kwalukila ne “kumushintulula kumwaluja mukàji virgò cyàkàbìdì,” ne kumuseleshisha cyàkàbìdì kùdì mulùme ewu. Macimbu’s we! Kumukùdimuna kumwalujayè cyàkàbìdì virgò? Mmusèdiibwe, ku mèsù kwà Nzambi, ne mmusòmbe mu masandi. Ncyà bushùwà menemene. Aci cìdi EMU MMÙDÌ MUKALENGE WÀMBA, cyòci pààci. Bulelèlà.

<sup>149</sup> Bundù kaayi’s wè! “Mufutè mfrangà bùngì cyaanàà.” Kì bwà cinyi èkèleeziyà minène yònsò eyi ne bilongelu bìdì bìibàkiibwe. Ke mùdibi nàнку. Buloba bujimà. . . Kanwèna bacimanyè to, muneemu mu Ètats-Unis emu. Bìvwa bikèngela nwènù kundonda dyàmwàmwa dyà mbù, musangu kampànda, nènku nenùjandulè. Eyowà’s, mukalenge. Wèwè muyè kuntwaku, mwanèètù, kùdìbo ne bukòkeshi aku.

<sup>150</sup> Ndi mwà kunùtwàdila fòtò, mwena dìnà, Mwanèètù Kopp nguvwa ufùma ku dimukwàta, ne kumuntùminayè, wa muyiishi wa cyena Mishòonyi, Muyiishi wa Nyumà Mwimpè, mulààle mu mùsèèsù, mùle mutuntùle menemene pabwipi ne bule *ebu*, yéyè ne mukàjèndè, ne mwànà mukesè wa bakàji, mùle mutuntùle mùshindù ewu; bwalu bàakayiisha Yesù Kilistò, bukòlè bwà dibìikà dyà ku lufù, ne bantu bàvwa mwà kusungidiibwa ne kupeta Nyumà Mwimpè. Bààkabàshebeya mu mùsèèsù, ne kabàyikù mwà kulekela bwà kujiikiibwabò nànsha, ne bàbàtwilà matè, munda mwà matùkù ne matùkù. Ncyà bushùwà.

<sup>151</sup> Ànu mwaba mene ùvwa Mwanèètù Osborn ne cyà kukwàciibwa, munkaci mwà bingoma, bwà kubàpàtulabò. Bààkaya kuntwaku, ne ewu. . . kasumbù kàà baansaserdòsè kààkalwa kudisanga ne kushebeyabò nsongàalùmè ewu. Nènku mukàji ùcivwa ànu ne mwànà wa mu dibòko. Nènku bààkapičila mu mùsèèsù mùshindù awu, biikàle ne—ne—ne mulongo wà bantu bàpweka nendè ku lukitá bwà kukamujiikabò. Nènku maamù ewu wènda, ne mwànà wa mu dibòkò, ùdila mwadi, paanyimà pàà báyendè mufwè awu. Ne bantu bàtàngidila ku dididiishi, bantu bàà mwoyi mutòoke, bamba ne: “Byòbì ne mùshindù awu ke ùdì mmwènenu wa èkèleeziyà wa Kàtòlikè, tudì tumubènga.” Ne bènda bàbàlonda, kùdì binunu ne binunu, bàpweka ne mùsèèsù. Mwanèètù Osborn ùvwa mwenze ditàbuluja kuntwaku, mu mùshindù wà kabàciyikù mwà kumupàtula mu ditùnga to. Kùvwa bantu bapitèpìte bùngì. Ncyà bushùwà menemene.

152 Kaa, lubombo naanyi's wè! Ndi mumanyè ne ncimfwànyì cìbì. Shààlaayi basòmbe ànu pòlàà, balundà bàànyì beena Kàtòlikè, netùfikè ku dilenga lukwàbò luseke alu, mu tusunsa tukesè emu. Mbîmpè. Mònayi.

153 Mpindyewu netùpwekè, mònayì, ntàntà mukesè ndambù. Lekèlaayi nnufikishilè eci. Pàmwàpa ndi mwà kupeta díbà, ncìdì kàbìdì ne tusunsa makumi àsàtù. Tàngilàayi ne ntèmà. Mpindyewu twàlukilàayi, mubadi yònsò, ànu mu meeji èbè amu, bwà katancì kakesè cyanààna, bwà cimfwànyì cyà mu meeji. Pàvwà . . .

154 Mwena kwitabuuja yònsò udi Orthodoxe kaaba aka mmumanyè ne bukòokeshi bwà bàà Bisàmbà byà bendè bwàkabanga ne Mfùmù Nebùkàndànèèsà. Ncyà bushùwà anyi? Mwena kwitabuuja yònsò udi Orthodoxe mmumanyè aci. Ne Mfùmù Nebùkàndànèèsà wàkapeta cìkèèna-kumòna, ki Danyèlè kumupèèshayè dyumvwija. Ncyà bushùwà anyi? Ne ùvwa mutù wà ngòlò, uvwa mwena Baabùlòonà; mwibìdì wùvwa Medàayi ne Peelààsà; bùvwa bùlonda bùvwa mbukalenge bwalàbàlè bwà Ngèlikà; pashìishe Bukalenge bwalàbàlè bwà Loomò. Nènku ku ndekeelu kwà Bukalenge bwalàbàlè bwà Loomò, Yesù Kilistò nguvwa Lubwebwe lùvwà lujoomòke ku mukùna, kalùyì lutùula kùdì byanza to, lwàkabùngulukà ne kuzaaza lupìngù alu (mmwómò anyi?), ne lwàkabwikila buloba. Muntu kanà yònsò ewu mmumanyè aci. Mwena kwitabuuja kanà yònsò ewu mmumanyè aci.

155 Ne mùvwàbì ne, mu matùkù à ndekeelu, pàakakòsolokàbò mu makalenge mashìilèshìilàngàne bùngiwù apu, ne bikwàbò, ku bàna bàà nkàsà, kùvwa cyamù cifiike ne diima. Nènku cìdì cyumvwija ne, mupròfetà mmwàmbè ne: “Ànu muwamònu wèwè ne cyamù cifiike ne diima kabyàkusambakanakù pàmwè to, ki mwikalà aba kabàyikù mwà kulamakanakù to umwe ne mukwàbò to.” Kàdì nebàsambakaje mamiinu àbò, bàteeta . . . Mu ngakwilù mukwàbò, nebàselanganè mu bòbò, bàteeta bwà kukolesha bàna bààbò kàdì kukòsa, bwà makòokeshi, mùshindù awu. Ne nwènù's nudi bamanyè ne aci mbulelèlè. Kàdì, cyeyemenu, cidìci naaci, ne nwènù pèenu nudi nuciitaba, “Kaa,” nwamba ne: “mbilenga be.”

156 Tàngilàayi Stevenson ewu, dìnà dyèndè ní nganyì, kuntweku. Mpindyewu wendè . . .kuntweku. Dìnà dyèndè nganyì's? Nyèwù ngápù ne mwoyi. . .Mulùmjànà wa kuntweku, udi ujuula makòkyanganyì ònsò aa munwemu emu awu. [Disangisha didi dyàmba dìnà—Muf.] Èyo. Kaa, ekèlekèlè!

157 États-Unis ewu mmubolè too ne penyì. Èyowà's, mukalenge. Ndi mwà kunùjaadikila musangu mene pàdì. . .Mukàjì ewu mwaba ewu, mu Bwàkabuulwibwà 12, pàvwà. . .Mwanèndè wa balùme wàkabàndishìibwa bwà kusòmba pa nkwasà wa butùmbi wa Nzambi, ne, pàakasòmbye, mukàjì wàkanyeemena

mu cipèèlà, mwaba ùvwàbo bà mukòweleela munda mwà matùkù cinunu ne nkàmà yibìdì ne makùmi àsambòmbò, ànu menemene ditùkù dyà ngondo dyà Plymouth Rock, menemene, kwàkafùminà èkèleeziyà bwà budikadidi bwà ntèndeleeleu, ne mùdibu bushikikiùbwe mùnwemu emu.

158 Nènku netùbalè mu nshapità wa 13 wa Bwàkabuulwibwà mwaba ewu, nènku tàngilàayi kùnweku ku mvensà wa 15. Nènku, mpindyewu, katanci kakesè cyanààna, ndi muswè kwalukila kumpàlà kwà cyòci aci, ne tudì tumòna apa ne Yèyè ùvwa mwimàne ku luseke lwà mbù eku. Mpindyewu bu mémè ànu mwà kupeta mwaba awu, wà ne, mvensà wa 11.

*Ne ngàkatàngila nyama mukwàbò uvwa upàtuka mu buloba; (kaciyi mu—mu màyi to) . . .*

159 “Ùpàtuka mu buloba.” Pashiishe, dyungwila ne misumbà yà bantu ayi’s mmàyi, dìbà adi eci ke mwaba wùvwà kawùyi bantu, États-Unis.

*. . . ne yèyè uvwa ne nsèngu yibìdì bu mwànà wa mùkòòkò, . . .*

160 “Nsèngu yibìdì bu mwànà wa mùkòòkò,” kàyi mwànà wa mùkòòkò to. Ncinyi aci? S’ki wetù ngombangòle wa cyena Àmèrikè nyèyè awu. Bushùwà’s. Nwamònu’s, s’ki yèyè awu, “nsèngu yibìdì bu mwànà wa mùkòòkò.” Kàdi pashiishe cyàkenzàye ncinyi? Ùvwa ne budishikaminyi bwà ntèndeleeleu, dyàmbedi; ùvwa wenza maalu bu mwànà wa mùkòòkò, wàkaakula bu mwànà wa mùkòòkò. Kàdi, vùlukàayi ne, yèyè kàakalwakù cimpàngà cyà mùkòòkò cyà kale nànsha. Yèyè ùvwa mwànà wa mùkòòkò. Ditùnga edi didi ànu ne bidimu lukàmà ne makùmi àtaanu cyanààna, nudi bamanyè’s, ànu mwànà wa mùkòòkò cyanààna.

*. . . ne pashiishe yèyè wàkaakula bu dragon.*

*Ne yèyè wàkawkàta mudimu ne bukolè bwònsò bwà nyama wa luonji bwàkadìye naabò kumpàlà kwèndè abu, (dragon mukùnze awu), ne wàkenzeja bònsò bàvwà pa buloba, bàdì basòmbè pamutù pàà buloba abu, bwà kukuwkwila . . . nyama wa luonji, mwena mputà wa lufù wàkondopiibwa awu. (Tàngilàayi!)*

*Ne—ne yèyè ùdi wènzà maalu à kukèma manène, nànkù ùmufikisha too ne ku ditùulula kapyà kàfùmina mu dyulu . . . (Bombè bwà mushindà, ne bwà hydrogène; ditùnga dyà meeji matwè, dyà lungènyi, ne bikwàbò, ùseeswisha matùnga ku bintu ebi.)*

161 États-Unis ewu neàkafikè mu cikondo cìikalà èkèleeziyà ne mbùlāmātadì mwà kudisanga. Ne beena Mishònyì ne beena Kàtòlikè nebàsangishe bintu byàbò pàmwè, bwà kulwisha communisme. Udì ànu munkaci mwà kukwàta mudimu

menemene mu byanza byà cyàkambà Nzambi mwab'ewu aci.

<sup>162</sup> Ne nwèù beena Mishòònyì bàdi balààle kuntu kwàka bàba, bayè mu tulù tukulè, nubala cikàndàkàndà cyà bwalu bulonda bwà dinanga pamutù pàa Bible wenu's! Nupàtuka, nwenda nulalakana mwaba kampànda, nuya ku fetè kampànda, pamutù pàa kubwela mu disangisha dyà milòmbò mwaba kampànda; nukòkangana muntu ne mukwendè pa tuntu tukesè twà kale tùdi katuyi tütàmba kwikala ne mushinga *mene* to. [Mwanèètù Branham ùdi ùtuuta cishòndò—Muf.] Bivwa bikèngela wèwè kwikala ku binù mwaba kampànda, bu wèwè mumanyè cìvwà Cyendèlèlèlè cyùmvwija.

<sup>163</sup> Mònaayi, pàvwàbi ne, Mfùmù Nebùkàndànèèsà, ku cibangidilu kwàka, pàakatwàdijà cikondo cyà bàà Bisàmbà byà bendè. Tutàngilààyibi mwàkabwelaci. Ne mùshindù wàkabwelaci, nenùjandulè ne cìdi cìpàtuka mùshindù ùmwèùmwe awu. Tudi bamanyè ne kùdi ntwàdijilu wa cikondo cyà ngàsà bwà bàà Bisàmbà byà bendè, ne ndekeelu wa cikondo. Ncyà bushùwà anyi?

<sup>164</sup> Mpindyewu tàngilàayi, pàvwà Mfùmù Nebùkàndànèèsà. . . pàakatùmiibwà Danyèlè muntwamu, mupròfetà wa meeji matwè, pàvwà beena Yuda bakwàbò bònsò mu mùshindù kampànda bapwekèshiiibwe panshi ne biinamina beena Loomò. . . anyi kùdi beena Baabùlòònà. Kàdi kùvwa bàsàtù, bantu bànaayi; bàsàtù (Shandàlàkà, Meshàkà ne Àbedènègò), ne Danyèlè, bàakapàngadikà mu mwoyi wàbò bwà ne bàvwa ne cyà kusadila Nzambi. Nènku pashiiishe pààkelàbo Shandàlàkà, ne bakwàbò, mu. . . Ne Danyèlè ùkaavwa mumanè kulwa muntu munène, ne kumpalà kwà Mfùmù Nebùkàndànèèsà ne Beleshààsà, ne bakwàbò. Pààkalwàye muntu munène, mpindyewu tàngilàayi, Mfùmù Nebùkàndànèèsà wàkenza cimfwànyì cyà ngòlò ne kucitèeka mu budimi, ne kwambayè ne muntu yònsò ùvwa ne cyà kwinaama ku cimfwànyì aci.

<sup>165</sup> Nukàdikù kacya bamòne dibinga dyà cintu aci anyi, cimfwànyì aci cìvwa cyenza cyà nganyì? Cìvwa cyà Danyèlè, cimfwànyì cyà muntu. Nènku kacìvwa cyàmba ne: “mikishi yà tunzambi,” bumpànganu's? Ne bu mutùdi leelù ewu, tudi naatù túsàtù anyi tùnaayi tujimà. “Mikishi yà tunzambi mmisòmbèle munda mwèndè,” ne bààkenzela Danyèlè cimfwànyì. Ki kwambayè ne: “Bònsò bààbèngà kwinaama lupingù alu, nebèèdiibwè mu cikùtù cyà kapyà.” Nudi numòna's, Danyèlè mmumùshiiibwe mu cyalu pa dîbà adi. Nudi bumvwè cìndi muswè kwamba aci anyi? “Nènku ewu yònsò wabènga kwinaama lupingù alu neakòshiiibwè tutùpàtutùpà, anyi neèdiibwè mu bwina bwà ntambwe, anyi kooshiibwa mu cikùtù cyà kapyà, anyi cintu kampànda, dinyooka kampànda.”

<sup>166</sup> Mùshindù awu ke wàkabangà cipungu cyà bàà Bisàmbà byà

bendè, ne mmwènekèlu wa cimpàngaanù wa dikuukwila dyà butèndeledi, ne dikèngesha dyà kubàfikisha ku dilwinaminabò. Ne Bible ùdi ùdyànjila kwamba ne necijikè mùshindù wùm>wè>wùm>wè awu, “Muntu wa cijila,” Yesù Kilstò; cimfwànyì Cyèndè, bwà kucikuukwila, ne bikwàbò.

167 Vùlukàayi ne mu mukàndà wà bafwile diitaba wà Foxe, bàvwa bàbàtèekela nkùrusè kumpàlà kwàbò, ne bàswikila ngombe ku dibòko dyònsò mùshindù awu, ne bàvwa mwà kwamba ne. . . Wèwè kùyi mulekèle, mulekèle bwena Mishòdnyì to, ne mulwè mwena Kàtòlikè ne “mutwè nkùrusè ewu mishiku.” Bàvwa basàkila ngombe umwe luseke elu, ne mu kwàbò lukwàbò luseke, ne pashiishe bàyisàka ewu eku ewu eku. Bàvwa bàbòdshela pa nkùnyi. Mbènzènze bintu byònsò. Nkàdikù muyè mu nkità yà mwinshì mwà buloba yà kale ayi; ndi mumanyè cìndi munkacì mwà kwamba eci. Nènku, nwamònu’s, aci, ncyà bushùwà. Nènku’s ki mwòmò amu mùdìbo balàale. Nènku mònaayi mwàkapicilàbo mu matùkù à difwilà dyà diitabuuja awu kumpàlà kwà Martin Luther. Bilondèshile Bible, kàbidì.

168 Nènku mònaayi ne ntèmà yònsò mpindyewu. Mpindyewu ndi muswè bwà nùmonàayi cintu cinène. Bukalenge bwà beena Baabùlòonà abu bwàkakòseka bìshi? Dilòlò kampànda pàakayàbo kuntwaku ne kwangatabò nzàbà yà cijila yà Nzambì, ne kubangabò kunwinamù mvinyò; kubangabo kucyònkomoka, ne kupàtuka ne musùmbà wà bakàji pambèlu apu, bakàji bàà milàmbù, ne bàvwa bàja maja ne bàbuulula bilàmbà ne bàpicila mu cikondo cyà dicyònkomoka. Ncyà bushùwà anyi? Dìbà adi kùvwa mufùndu wàkalwà ku cimanu ne: “MENE, MENE, TEKEL, UPHARSIN.” Mmwòmò anyi? Ki kuyabò kangata beena Kaasàdà, bantu bààbò bàà meeji matwè abu, bidimba byà civùmvù byà èkèleeziyà, ne nànsha umwe wa kùdìbo kàvwa mwà kucibala to. Ncyà bushùwà.

169 Kàdi bàvwa ne muntu muntwamu uvwa mwà kubala myakulu myenyi, àlèluuyàh, uvwa mwà kuyàdamuna. Nudi bamòne cìndi njinga kwamba aci anyi? Yèyè’s uvwa mufwànyìne kwandamuna myakulu myenyi. Ki mùshindù wàkapàtukàci ngwòwò awu.

170 Mùshindù awu ngùdiye ùpàtuka mpindyewu, mwikàle ne bukolè bwà Nyumà Mwìmpè pa cisàmbà cidi cyùle ne dibàtiiza dyà Nyumà Mwìmpè, cidi ne bukolè ne bimanyinu ne maalu à kukèma. Ki Èkèleeziyà wa bàà Bisàmbà byà bendè uyàaya wàwa. Ke bàshàadilè mbwòbò abu.

171 Ke mùshindù ùdici cibwela awu, ke mùshindù ùdici cìpàtuka awu, menemene, diinamina ne dyenzeja bantu bwà kubwelabò ku ntèndeleeleu wa citùpà mu cimpàngaanù. Nènku Nzambì ùbìnduluka mu dìbà dyà bwalu butondè ne ùfùnda mu myakulu myenyi, ne muntu awu uyàdamuna. Úvwa mwà kwandamuna. Kàvwa mumanyè mwakulu awu to; muntu

mukwàbò nànsha umwe kàakawùmanya to. Kàdi yéyè ùwva ne Nyumà Mwímpè umwèumwè awu, wàkamufikisha ku dicyùmvwija awu, n’Nyumà Mwímpè umweumwe awu mu Èkèleeziyà leelù ewu.

<sup>172</sup> Wèwè udi uCibiikila ne “ndikolesha dyà maalu.” Mémè nèngiitabè ne bàdi naadi dyábúngi. Kàdi, mwanèètù, kùdi cyà bushùwà mwaba awu, kàbìdi. Ncyà bushùwà, cyà cilelèlà kuntwaku, kàbìdi. Dyabùlù ùdi ùkùpa byònsò bidiye mutentùle bìdiye mwà kukùpa abi, ànu mu njila awu bwà kufila cibwejàkàjì. Nènku pawikalà kùyikù utùma meeji èbè kùdi Nzambì mu mùshindù wa wèwè mufwànyine kusòmbakù panshì ne kubala Bible webè, ne kusambila ne kwebeja Nzambì to, díbà adi bìdi bìleeja ne kwèna wangata musùkà wèbè ne mushinga nànsha.

<sup>173</sup> Tùngunukà ànu kuntwaku ne wàmbè ne: “Nzambì, ncyèna ncyùka bìshi byà kukwàta naabì bikòlòlò byùdi Wèwè mutèèke pambèlu pàapa to. Ndi mmòna Bible Webè ùcyàmba, ne ndi mupàngàdike!” Ncyà bushùwà. “Wèwè ngwàkandaya bwalu abu, dimiinu dyà Abraham.”

<sup>174</sup> Nzambì yéye mukubiikila, neùlwe kùdiYe; kàdi wèwè kùyì mubiikidiibwe to, nànsha wèwè mwikàle mutèndeledi wa bìshi, kwèbè nkujike; kwàjiki, kwèna mwà kulwa to. Muntu nànsha umwe kèna mwà kucyènzà to, ànu Yéyè mukubiikile. Ne Yéyè kí mmuswè bwà muntu nànsha umwe àbùtukè to, kàdi bààbúngi bàà kunùdi nebàbutukè bwalu nudi batàmbe kulèngulula bwalu Abu.

<sup>175</sup> Nènku nenùnyungulukè ne kumòna cintu kampànda cimwèka bu cyà dikolesha naaci maalu, cinùbwikila ndambù wa mundidimbi, “Èè, Docteur *Kampànda’s* mmwàmbe *cikampànda*, ne bikwàbò.” Kàdi pashìishe unyunguluka ne upenda Nyuma Mwímpè, udi mumanyè ne aci ncilelèlà, ne kacayàdyàkufwidibwakù luse nànsha.

<sup>176</sup> Nenùjandule mu tusunsa takesè emu cidi cimanyinu cyà dyabùlù, cidi cì—cidi cìtampì cyà dyabùlù ciikalàngàne, ncimanyinu cyà nyama wa lwonji. “Ewu yònsò udi wakula bibi bwà Nyumà Mwímpè, kàadyàkufwidibwakù luse to, mu eci cikondo, anyi mu cikondo cicilwalwà.” Tàngilàayi èkèleeziyà wa kumpàla awu, cyàkenzàbo. Tàngilàayi numòne, pa bìdi bitàngila, èkèleeziyà mwibìdi ewu! Udi mufwànyine kudikàngila pambèlu pàa Bukalenge bwà Nzambì, ne kubwela mu dyabùlù; kubwela mwaba ùdi “kawùyì difwidibwa dyà luse to, ní mmu buloba ebu, ní mmu bùcilwalwà.” Cyà bushùwà. Pa nàнку, ikàlà mudimùke, endà ne kaneemu kònsò. Ikàlà mudimùke bwà cyùdi wenza, bwalu kwèna mumanyè cìikalà mwà kwenzeka to.

<sup>177</sup> Mpindyewu, tudi tumòna byònsò ebi mpindyewu munkaci mwà kwenda kukùngwila mushiki. Ndi ne tusunsa makùmi



àbìdì. Ndi muswè nùbuulule pàmwè naanyì mu nshapità wa 17, Bwàkabuulwibwà, bwà kujikija ànu mu katanci kakesè cyanàànà emu. Mpindyewu netùfike mu njila wa dyalukila kumbèlu. Tèèlejàayi ne ntèmà. Balàayi pàmwè naanyì. Kàngulàayi Bible wenù awu ne nùdìlongòlòlè bwà kubala. Eci cìvwa ne cyà kucìshìndika.

178 Vùlukàayi ne, kùdi bimanyinu bibìdì; cìmwè ndipàmbuka, cìkwàbò n'Nyumà Mwímpè. Cìmwè ncimanyinu cyà dyabùlù.

179 Vùlukàayi ne, nkàadi mwàmbe bwalu ebu, ne èkèleeziyà wa Kàtòlikè wa ku cibangidilu. . . Mpindyewu, nwènù beena Kàtòlikè, sòmbaayi mu kaneemu bwà katanci kakesè. Èkèleeziyà wa ku cibangidilu wa Kàtòlikè bàvwa ne wabò mmwènenu pa bwalu abu. Bàvwa ne dilongesha dyà mafi, dyà ukàristiyà munsantu, dyà kwangata cyostiyà pamutù pàà dibàtiiza dyà Nyumà.

180 Beena Mishòonyi bàdi bàsungula dilabulangana dyà ku cyanza, anyì dyenza dyà mucipù; bònsò bàbìdì mbapiile, bilondèshile Díyi dyà Nzambi. Eci ki dizòla adi. Bàdi bàlwa ne bàbàtiiza ne: “Taatu, Mwàna, Nyumà Mwímpè,” piinè apu mpàdiku kakùyiku kasangu nànsha kàmwè kàvwa muntu nànsha umwe mubàtìijìbwe mu mùshindù awu nànsha; cìdì cìikàlè kakùyì mpatà to dibàtiiza dyà cimpanganù, dyà cyena Kàtòlikè adi. Ne bòbò bàdi bàcìitaba, bàmba ne: “Nwènù beena Mishòonyi nudi nwinamina dibàtiiza dyètù.”

Mémè kwamba ne: “Nudi nucyèna bwà cinyi?”

181 Yèyè kwamba ne: “Èkèleeziyà wa Kàtòlikè ùdi ne bukolè bwà kushintulula Mufùndu kanà wònsò wùdiye muswè awu.”

Mémè kwamba ne: “Aci's mmashimi.”

Yèyè ne: “ Kàdi bwà cinyi nudi nuciinamina?”

182 Kaa, díbà adi neùbwikidijè mukana. Kí mmémè to! Mémè ncìtu ncìitabuujà to. Eci ke Díyi dyà Nzambi. Ncyà bushùwà. Bantu bòbò baswè kulonda, bikèngela bàdyendèlè nkàayabù. Bikèngela ngàmbe Bulelèlà. Ncyà bushùwà.

183 Mònaayi ne, pashìshe bàdi bàpàtuka ne bikwàbò byònsò ebi, èkèleeziyà, bàshàala bàà ku kàtèshismù kààci kàà kale aku ne bintu byònsò abi kuntwaku. Mmusùmbà kaayipù wà bintu byà macimbu ne lukutukutu's wè! Ne mmutooyisha miliyaalà yà beena dyabùlù, ne mashikà à kwìsùkwìsù. . .

184 Ncyà dyabùlù, ànu kwònsò kwònsò eku. Nènku ndi mwà kunùjaadikila ne Bible mmwambè apa ne: “Buloba bujimà bwàkàkàcìla bwà bukolè bwà nyama wa lwonji ebu; uwwakù, udi kàciyikù, ne udikù kàbìdì.” Mmunyì mùdici mwà kwikala nànkù ne: “uwwakù, ne kàciyikù”? Yèyè kwamba ne: “Buloba bujimà kukàcilabò bwà bwalu abu.”

185 Pààkalwà Loomò wa cimpanganù awu Loomò wa ciipaapà, kacyàkajikaku nànsha. Ndongolwelu wa cyena Loomò wàkajika;

dibà dyàkalwà mfùmù mupyamùpyà, yéyè wàkatèeka ànu bulongàme buyabùpyà. Kàdi pààkabwelabo mu Loomò wa cimpàngaanù, kupìcila ku èkèleeziyà wa Kàtòlikè, ku bwena paapà, kacyàkajikakù to. Paapà umwe yéyè mufwè, bàdi bàtèeka mukwàbò; paapà umwe ùfwa, bàdi bàshikika mukwàbò mu nkwasà. “Nyama wa lwonji wakadikù awu, udi kàciyikù awu, udikù kàbìdi awu; udi kàyikù awu, kàdi udikù awu; udi. . . ne wáyà mu dibùtuka awu.” EMU MMÜDÌ NYUMÀ MWÍMPÈ WÀMBA, ku Mifundu.

<sup>186</sup> Mpindyewu, tèelejàayi. “Nènku kwàkalwa umwe. . .” Nwènu bònso tàngilàayi mpindyewu, nshapità wa 17.

*Ki kulwaku kùndi umwe wa ku banjèlò mwandamutekète bàvwà ne mpanza mwandamutekète ayi abu, (abi's ke mpànza yà ndekeelu, yidìbo bapòngòlòle), ne kuyiikilayè naanyi, wàmba ne. . . Bànda kunweku; nènku nènkuleejè. . . cilumbulwidi cyà mukàji munène wa masandi udi musòmbe pa màyi manène auu:*

<sup>187</sup> Tàngilàayi Bwàkabuulwibwà 12. Awu ùvwa mmukàji virgò. Ùvwa inàbànza mulelèlè. Mùshindù mwìnè ùvwaye mwimàne mulenga's wè!

<sup>188</sup> Kàdi kùdi umwe udi ubiikidiibwa ne mukàji wa masandi, “n-d-u-m-b-à,” cidi cyàmba ne mu- . . . Ncinyi aci? Tùkukwilàayi eci. . . anyi tùcitataayi.

<sup>189</sup> Numfwilaayikù luse. Bu mûndi nya lùbilu lukolè; pàndi ngèèla meeji ne ndi ne tusunsa dikumi ne tutaanu. Nènshaalè dibà dikwàbò dijimà, pa nànu shààlaayi ànu pòlàà. [Disangisha didi dyàmba ne: “Amen.”—Muf.]

<sup>190</sup> Tàngilàayi. Èyo. Tàngilàayi, twanjàayi kucitaatabi tûng. Mmukàji wa bukooyà. Mukàji wa masandi nganyi? Mémè ntu ngumvwa bibi bwà kwamba mwàkù awu, kàdi's mmufùnda kaaba aka mu Bible. Mmukàji udi udyàmba mùdiye mukàji mwímpè, kàdi wènda masandi ne bakwàbò balùme. Mpindyewu, piikalàbi ne mukàji ùdi ùleeja èkèleeziyà, dibà adi ng'èkèleeziyà ùdi ùjikula wàmba mùdiye mwena Kilistò, eku wènda masandi ne bintu bikwàbò. Ncyà bushùwà anyi?

<sup>191</sup> “Ne mmusòmbe pa màyi manène; mupimbu ne misùmbà yà bantu.” Balàayi. . . lwà ku mvensà wa 15 nènku nenùmonè aci, nwamònu's. Anyi, wa 17, lwà mwómò amu. Netùkafikèku mu katanci kakesè emu. “Mukàji udi musòmbe pa màyi manène awu; mukàji wa masandi awu.” Cintu kaayipu's wè! Mpindyewu bu ne tuvwa ne matùkù malondàngàne, mvwa mwà kwangata mukàji awu ne kumuleeja kuumukila ku Kaayinà too ne ku Dilwa dyà Mukalenge Yesù, ne kunùjaadikila ne ùvwa nyéyè wakumpàla bwà kuvwija èkèleeziyà bulongolodi. Nyéyè udi mamwèndè wa bulongolodi. Tàngilàayi ne: “Ne mukàji udi musòmbe pa màyi manène awu. Pa, musòmbe pa màyi manène.”

Mpindyewu mvensà mwi2.

*...udi (b-a-m-f-ù-m-ù) bamfùmù bàà pa buloba bendè nendè masandi, ne bàdi basòmbèle pa buloba mbabàfikishe ku dikwàcika mvinyò wa masandi èndè.*

<sup>192</sup> Mu ngaakwilù mukwàbò, ùdi ùjikula wàmba mùdiye èkèleeziyà wa beena Kilistò; mutumbùke, mulenga kumòna. Tàngilàayi numòne mùdiye muvwàle, mu tusunsa tukesè emu, ne masàngà ne ngòlò ne mabwe. Bàdi bàmba ne: “Udi bu yéyè awu nganyi?”

<sup>193</sup> Nènkù ùvwa ne lupànzà mu cyanza cyèndè, lùle tètè ne “mvinyò wa masandi èndè,” bukooyà bwèndè, dilongesha dyèndè divwàye wènzeja bamfùmù adi, kaa, ànu bwà kwenza kaadisambila kakesè ne “kunasambidila bwà nwènù kupatuka mu mpùrgàtoriyò,” ne bintu byònsò ebi. Ki cyòci aci. Ki bwalu mbwòbù abu’s. Ki Díyi dyà Nzambì díndi munkaci mwà kubala adi’s. Tàngilàayi ne: “Nànkù yéyè kuya naanyi kule mu...” Mpindyewu tùmònèbi, ne kwenza mvinyò...Ncyà bushùwà, mvensà mwi3 mpindyewu. Eyo.

*Nènkù wákaya naanyi mu nyumà mu cipèèlà: ne nakamòna mukàji musòmbè pa nyama mukünze wa diikal-...awu, ... (“Mukünze,” mubanji, èkèleeziyà wa mutàmbe kubanjika pa buloba.)*

<sup>194</sup> Bàdi bèèla mbilà kaaba aka ne: “Nganyi udi mwà kwenza nendè mvità?” Kùdi muntu umwèpelè pa buloba, ànu muntu umwèpelè pa buloba, wa buloba bujimà, udi ne bukolè bu mùvwà cikèèna-kumòna cyà Mfùmù Nebàkàndànèèsà amu. Bàna bàà nkàsà dikumi abu bààkapàtuka lubilu kubwela mu yònsò... Mulonda wà cyamù cifilike cyà beena Loomò awu wùdi wùya kabwela mu ditùngà ne ditùnga dyònsò pa buloba. Kakwèna muntu mukwàbò pa buloba apa udi ne díyi dyà kwamba mùdi naadi paapà wa ku Loomò to. Mfùmù wa ditùnga Eisenhower ùdi mwà kwakula mu Ètats-Unis, nènkù cìdi mmukenji; kàdi kùdi matùnga makwàbò àdiye mwà kwambila díyi, kàdi kabìyi bìbàmbila bwalu to. Kàdi balombodi bàà myànzu bàà Kàtòlikè bàdi mwà kwakula mu Loomò, ne ditùnga ne ditùnga dyònsò nedìpungulujè ne cibingu cìkolè. Ncyà bushùwà. S’ki yéyè awu. Mpindyewu netùmònè mwaba ùdiye ùsanganyiibwa, bwà kumòna ne nyéyè anyi ki nyéyè, bwà kumòna ne mmukwàciibwe fotò ànu mwab’ewu. Eyo.

*...ne mèmè kumòna mukàji musòmbè pa nyama wa dikala dikünze künzüü, (mubanji), mùle tètè ne mènà à kupenda naawù Nzambì, ...*

<sup>195</sup> Dibàtiiza dyà mashimi; bubanji bwà mashimi; ùlombola bantu mu bufofo, ùbàmbila ne bàdi ànu mwà kulwa mu èkèleeziyà, bènza ditonda dyàbò dyà mpèkaatù, ne bikwàbò, bèèla “Mwoyi Màriyà,” bènza didikèngesha. Dipanga! Lukutukutu naanyi’s we! Ncyèna mmòna mùdi bantu, meeji

mîmpè à cyena ditunga, bafwànyine kwitabuuja bintu byà mùshindù awu to.

*. . .mwikàla ne mitù mwandamutekète . . .*

<sup>196</sup> Ki bwalu mbwòbù abu's cyàkàbìdì, démon umweumwe udi mu nyungulukilu emu ewu, dragon mukünze awu, nyama wa lwonji ne bikwàbò byònsò, ùdi ne “mitù mwandamutekète; nsèngù dikùmi.”

<sup>197</sup> “Nènku mukàjì,” mukàjì awu, mpindyewu, èkèleeziyà. Mpindyewu, *nyama* mbwena kwamba ne “bukolè” bùvwàye naabù, èkèleeziyà wa Kàtòlikè wa cyena Loomò, kàdi bukòlè bwà Kàtòlikè bwà cyena Loomò. Kàdi, èkèleeziyà nyèyè ewu wàkula mpindyewu.

*Nènku mukàjì awu ùvwa mulwàcishùbwe bilàmbà byà diikala dikünze dyà kunzùù, ne bilamika ngòlò ne mabwe à mushinga mukolè ne masàngà, mwikàla ne lupànzà lwà ngòlò mu cyanza cyèndè lùle tètè ne cinyangu ne bukooyà bwà masandi èndè:*

<sup>198</sup> S'ki yèyè awu; ng'èkèleeziyà kampànda, nudi bamanyè's. Kì mmwòmò anyi? Bikèngela ikalèku; mmufwànyikijìibwe. Tùtungunukàayi ànu ne kubala nènku netùmonè ne yèyè ùdi nganyi.

*Ne pa mutù wèndè pàvwa pafùnda dìnà ne, BWALU BUSOKOKA, BAABULOONA MUNÈNE, MAMWÈNDÈ WA BANDUMBÀ, CINYANGU CYÀ BULOBA.*

<sup>199</sup> Èyo, mwena Mishònyì, apa's ke paùdi ukàmiiibwa. Newitabe ne yèyè nndumbà, kàdi yèyè ùvwa “MAAMÛ” (wa cinyi, wa bânà bàà balùme anyi?) “WA BANDUMBÀ.” Aci's ncifwànyine kwikala *bakàjì*, ncyà bushùwà anyi? Aci's ncifwànyine kwikala *maèkèleeziyà* dîbà adi, ncyà bushùwà anyi? Yèyè ke èkèleeziyà maamù dîbà adi, kî mmwòmò anyi? Martin Luther mmufùmìne penyi? Bwena Kàtòlikè. Mpenyi pàvwa byònsò ebi bitooyikile? Bwena Kàtòlikè, munkaci mwà kutwàla dilongesha dyàbò dìmwèdimwè adi, ne nudiinamina.

<sup>200</sup> Mpindyewu, mukàjì mutàmbe bubì bikolè mu Jeffersonville ùdi mwà kulela mwànà wa bakàjì mwîmpè, mulelèlè, virgò, ncyà bushùwà, ne ùdi mwà kwenda mululàme bu yèyè mwà kuswà bwà kwenda nànkù. Kì mwàkenzàbò nànkù kùdì èkèleeziyà wa ba-Luthériens, ba-Méthodistes, ba-Baptistes, ne ba-Presbytériens, ne bikwàbò; bààkenda balulàme bwà cikondo kampànda, dîbà dîvwà bààbò—bajuudi bààbò kuntwaku munkaci mwà kubàyiisha Èvànjeeliyò. Kàdi mpindyewu bàkaadi bàya mu sèndèmà, maja, ku tèlevisiyò, bânwa mfwankà, bènza bintu bikwàbò byònsò, (nudi bamanyè ne mbulelèlè's!), bàshààla kumbèlu mu dyàlumingu. Ncinyi ciinè aci? Bwalu ndumbà wenù awu ùdi wènza maalù bu mamwèndè. Aci's mmwòmò menemene. Aci's mmwòmò menemene.

<sup>201</sup> Mpindyewu twánjì tùmónààyìbì mwaba ùdì diikala disanganyìbwa. Bible mmwámbe ne yéyè ùvwa “MAMWÈNDÈ WA BANDUMBÀ.” Ne muntu yònsò ewu mmumanyè ne cívwa n’Loomò wa cimpàngaanù, anyì Mandamu Loomò wa ciipaapà, èkèleeziyà wa Kàtòlikè. Mu katanci kakesè emu, nènnùleejè, bilondèshìle myaba yà kumutèèka pa buloba, ànu menemene mwaba wikalàye musòmbe awu. Cyà bushùwà. Kùdiye ne yéyè ùdì nganyì, kì mùdì Bible mwambè. Kí mmémè to; Bible! Nènkù mmwámbe ne mmulelè maèkèleeziyà màná èndè à bakàjì àbúngì paanyimà pendè. Èyo, mpindyewu, ba-Méthodistes, ne ba-Baptistes, ne ba-Luthériens, ne bikwàbò, nudi numòna mwaba wunùdì nukafika awu, “MAAMÛ WA BANDUMBÀ.” Bàvwa ne nsòmbe lu ànu mwímpè, kàdì pàakabangà Bukènkè kukenka. . .

<sup>202</sup> Bìdì ànu bu mùdì mushikì wà mpènzù mu muvù wà luuyà. Teemèsha bukènkè, mu njila mùdì lupènzù lùkunya mulungu wà ditala wà kale, anyì cintu kampànda cikwàbò cyà mùshindù awu, kàdì munyìkàpu ne tàngilà mùdiyi yitùuka lubilu ne mwàyì mwònsò yikèba pa kusokoma.

<sup>203</sup> Udi uyiisha Èvànjeeliyò, anyì dibàtiiza dyà Nyumà Mwímpè, kùdì yàbúngì yà ku èkèleeziyà yà kale yà kwisùkwisù eyi, yidì kayiyi yineemeka Nzambi nànsha ayi; kàdì ùyitàngìle: “Twètù katwèna twitabuuja cintu cyà mùshindù ewu to. Mémè ncyèna ngiitabuuja nì ncinỳì. . .” Bwà cinỳì? Udi mumanyè cyùdì, ànu kwine kwònsò aku. Ncyà bushùwà. Ncyà bushùwà menemene.

<sup>204</sup> Ncyèna ngamba bwalu bubì bwà èkèleeziyà wenù to; mwanèètù, nwènu nudi ne bantu muntwamu bàdì bilengà. Ncyèna ngamba bwalu nànsha bùmwe bubì bwà búbènganganà ne beena Kàtòlikè to. Mémè ntu munangè beena Kàtòlikè mùshindù ùmwèumwè ùntù munangè beena Branham Tabernacle awu. Kí nnwènu to, balunda bànyì, bàndì nteeta kwela mbilà. Kí nnwènu to, ba-Méthodistes ne ba-Baptistes, ne Branham Tabernacle nànsha. Kí nnwènu bàndì ngèela mbilà mikolè to. Mpèkaatù unùdì nulekela dyabùlù ùnwèla pambidi awu! Ànu ne bwalu udi uya mu èkèleeziyà, ke wèwè kwela meeji ne udi musùngidiibwe.

Yèsù wàkamba ne: “Muntu yéyè kàyì mulediibwe ku màyi ne Nyumà to, kàakubwelakù to nànsha byà munyi mu Bukalenge.” Nènkù paùdì upeta dibàtiiza dyà Nyumà Mwímpè ne: “Bimanyinu ebi nebifilè aba bàdì biitabuujà.” Aci’s ncifùmina buludi ku dikaaya, mwanèètù. Anyì, kí ncyùmukila pa dikaaya to, ncifùmine buludi mu Bible. Kacya Yèsù kàakambakù ne: “Pàmwápa bimanyinu ebi nebifilè bàmwè to.” Yéyè wàkamba ne: “Nebibàlondè.”

Kaa, bàdì bàmba ne: “Mpindyewu, mémè ndi ngiitabuuja ne aci cívwa mbwà bàpostòlò. Ndi ngiitabuuja ne kùdì ànu

musumbà ùmwèpelè wà bàapostòlò, ne ngwôwò ùvwà kale ku cibangidilu awu.”

205 Ne dileesònà diinè ditùvwà naadi makèèlèlè dilòòlò awu dyà ne: “Yèyè ùvwà ne mìtootò mwandamutekète mu cyanza Cyèndè,” ne bìvwà bikèngela bwà mùtòòtò wònsò kufidiibwawù kùdi cikondo cyònsò cyà èkèleeziyà bwà Bukènkè kampànda, cyà bushùwà; ànu byàmwomùmwe ànu ne mùdiku mùpostòlò *kuntwaku*, ke mùdi mùpostòlò *mwab'awu*, nènku mùpostòlò kampànda *kuntwaku*, ne mùpostòlò *mwab'awu*; “cìvwà Nyumà mwandamutekète,” ku ntwàdijilu kwà dileesònà dyètù ne: “miimàne kumpàlà kwà Nzambi, bwà kutùmiibwayi mu Bikondo Mwandamutekète byà Èkèleeziyà.”

206 Kaa, mwanèètù, udi mufwànyine kwendakana ne kaadilongesha kakesè kampànda kàa ba-Baptistes anyi kàa ba-Méthodistes, kàdi kucìlonda; kàdi citàngilaayi, ku mèsù kwà Bible, musangu wùmwe. Ncyà bushùwà. Amen. Ndi ndyùmvwà bu mutèndeledi wa dikèma mpindyewu mene. Amen. Èyowà's, mukalenge. Tàngilà. Mwanèètù, s'ki bwalu abu. Aci ndivinga; kàdi mfimbù yònsò ewu, kènà ùkwenzela bwalu bwìmpè nànsha bùmwe. . .

207 Maamù, udi musòmbe paanyimà pààpa, ùvwà ne ciibidilu cyà kunnwisha manga à misàndà à màfutà. Patùcìvwà bânà bakesè kale. Bìvwà bikèngela twètù kudya màmpà à bukula bwà nsèke ne nkùnde, ditùkù dyònsò mu lumingu, ne mu dyàlumingu kàbidì. Mu mishindù kanà yònsò, bìvwà bikèngela nnwe bwanga bwàbùngi. Mu diisambòmbò dilòòlò, yèyè's ùvwà wènza misangu yònsò ànu bwà mèmè kunvwà manga à misàndà à màfutà. Ne mu disambòmbò dilòòlò mvwa mwà kukwàta ku dyùlù, nùnkù ewu, ncyèna ngamba eci bwà kwela bilèlè to. Mvwa mwà kukwàta ku dyùlù dyànyì, ne mvwa ngàmbe ne: “Maamù, ncyèna mwà kubùnwà to. Bùdi bùtàmbe kunnghendesha ku mwoyi bikolè.”

Yèyè ne: “Bòbò kabùyì bukuumvwije bibi to, kabwèna ne dikwàcisha kùdi to.”

208 Nànkù ke mùdi *Eci*. Cìkuvùndulula! Necìfikishe bwena munda bwèbè—bwèbè ku dikwàta mudimu bìmpè, bwà wamòna mwà kudya bìmpè Èvànjeeliyò mu kaabujimà.

209 Ba-Luthériens bààkalwa ne dibingishiibwa. Mòna's, bàvwà ànu. . .Kucìvwijabò bulongolodi cyònsò ne: “Èyowà's, mukalenge, twètù's ki èkèleeziyà!”

210 John Wesley wàkamòna dijidiibwa. Yèyè kwamba ne: “Ndi mmòna ne mbishiilàngàne.” Ki yèyè kwamba ne: “Bidi ànu bìmpè, Luther, kàdi's ki cyòci eci.” Yèyè ùvwà cinyi? Luther nguvwa mùtootò wà cikondo cyèndè, kàdi ki Wesley nyèyè ewu. Èyo.

211 Mpindyewu, pashiishe, beena Luther bònsò kwalukilabò cyànyimà ku cisàsà, bwalu bààkapwà mwoyi kùdi. . . kabàvwà. . .Mpindyewu, kì mbònsò bàdi. . .Ndi njinga kwamba

èkèleeziyà wa ba-Luthériens. Ba-Luthériens bàcìdi ànu ne bantu bimpè, bùjìbwe tètè ne Nyumà Mwímpè. Ncyà bushùwà. Kàdi mpindyewu mbaalùkìla bònso ku èkèleeziyà, mu cikondo aci. Èyo.

Ki Wesley ulwàlwa ewu. Yèyè kubàpicishila mu cikondo cyèndè.

212 Pashiishe, katanci aka anyi, pashiishe kulwakù. . . Paanyimà pàà cikondo cyà ba-Wesléyens, kulwakù cyà beena Mpenta. Nènku bààkapeta Nyumà Mwímpè, dyakula dyà mu myakulu.

213 Ekèlekèlè, ba-Méthodistes, ne ba-Nazaréens, ne beena Cijila, bàdi bàmba ne: “Kaa, ndyabùlù.” Nènku nudi numòna cinùdi bènze aci anyi? Nwàkapenda Nyumà Mwímpè. Kàdi nudi numòna mwaba unùdi leelù ewu anyi? Ncyà bushùwà. Nwènù, ànu menemene cinùvwà bènze. Bushùwà, nwákacyènta. Kàdi nwènù kupanga kwendela mu Bukènkè.

214 Nènku mpindyewu nwènù beena Mpenta nudi balwè civùmvù cyà dikèma, Cikondo cyà Èkèleeziyà wa Laòdikiyà eci, mu mùshindù wà ne Nzambi ùdi ùnùtwila mukana Mwèndè. Cyà bushùwà. Ncyà bushùwà menemene.

215 Wèwè udi wamba ne: “Udi witabuuja dyakula dyà mu myakulu anyi?” Èyowà’s, mukalenge. “Kacya ukààdikù mwakùle mu myakulu anyi?” Èyowà’s, mukalenge. Ndi ntùmbisha Nzambi bwà bwalu abu. Èyowà’s, mukalenge. Nkààdi mwakule mu myakulu, misangu yàbùngì. Ne ndi ngiitabuuja ne m’Bukolè bwà Nzambi. Èyowà. Kàdi, ncyèna ngiitabuuja ne cileeki cyà mbangilu, ndyakula dyà mu myakulu to. Kàdi ndi ngiitabuuja ne kùdi Bukolè bwà Nzambi bùdi bùkufikisha ku dyakula dyà mu myakulu, bimanyinu ne maalu à kukèma bìdi bìlonda. Èyowà’s, mukalenge.

216 Ne pashiishe dyabùlù kutèkayè cìfwèbà kuulu kwàka, muntu kampànda uvwa widikija ne wènta maalu bu ne ùvwa ne Nyumà Mwímpè. Ne nwènù bònso ba-Pèlerins de la Sainteté, ne Cijila, ne ba-Nazaréens ne nwènù bònso, nwaatàngila paanyimà e kwamba ne: “Éyi, ncyèna muswè nànsha cimwè cyà ku Cyòci aci to. Éyi!”

217 Kaa, luse’s wè! Bu ne nuvwa ne Nyumà Mwímpè, anyi citùpà cyà Nzambi munda mwà mwoyi wènù amu, bajidiibwe bu munùvwà mwà kwikala bajidiibwe amu, nùnkù’s nudi bajingùlùle ne aci m’Bukolè bwà Nzambi. Yesù kààkambakù ne: “Bu ne nuvwa bamanyè Mòsà, nùnkù’s nudi bamManyè Mémè kàbìdi anyi”? Bushùwà’s. Pìikalàbi ne dijidiibwa nciitùpà cyà Nyumà Mwímpè cìdi cikukezula ne cikujidile; wèwè ne Cyòci aci, neùjingulule bikwàbò byà Cyòci aci pààlwàCì.

218 Cyanza eci cìdi cijingulula cyanza eci. Mutù ewu wùdi wùjingulula dikàsà *edi*. Nciitùpà cyà mubidi.

219 Ne Bible mmwâmbè ne kùdi mapà citèema à Nyumà; bapròfetà, balongeshi, batangadiki, ne baprò- . . . ne bikwàbò; ne—ne dyandamuna dyà myakulu, dyakula dyà mu myakulu, dyondopa dyà kùdi Nzambi. Cyònsò necìjingululè kantu ne kantu kààCì.

220 Kaa, wèwè's udi uuminyina ne mashika ne: “Ncyèna muswè kwikala ne bwalu ne Aci to.” Yoyöyò! Kùdi kwènda kwènda luuya lwà apa nùku, kí mmwòmò anyi? Aci's mbulelèlè. Bwà cinyi? Bwà cinyi? Wèwè uvwa mudìvwijè bulongolodi. Èkèleeziyà webè ngudi mwâmbè nàнку awu, ne ki bwà cinyi wèwè kùvwa mwà kucyènda to.

221 Kàdi bààbúngì bàà kunùdi nwènu ba-Méthodistes kupàtukabò e kupetabò Nyumà Mwímpè. Bààbúngì bàà kunùdi nwènu ba-Baptistes bààkapàtuka e kupetabò Nyumà Mwímpè. Èyowà's, mukalenge. Wèwè, ne bààbúngì bàà kunùdi nwènu beena Cijila aba bààkapàtuka e kupetabò Nyumà Mwímpè. Èyowà. Bwà cinyi? Kanùvwa nucyùka civwà èkèleeziyà mwâmbè to. Nwàkendela mu Bukènkè. Amen. Kanùvwa nucyùka civwà cyenzèke aci to. Nuvwa bamanyè ne ùvwa Mukalenge, ne nwakadibwinkaMù dyàkàmwè.

222 Lekèlè wa kale—lekèlè inàbànza wa kale awu àshaalè paanyimà pàapa, mamwabò wa kale awu. Ùdi wènda maalu bu mamwèndè kale wàwa, ndumbà. Yèyè kudìvwija bulongolodi. Kì dīyì dikùlù diinè dyà ntwàdijilu dyà lutàtu, pààkadìvwijà èkèleeziyà wa Kàtòlikè bulongolodi. Pashiishe èkèleeziyà wa ba-Luthériens kudìvwijayè bulongolodi paanyimà pèndè. Pashiishe èkèleeziyà wa ba-Méthodistes kudìvwijayè bulongolodi paanyimà pèndè. Pashiishe èkèleeziyà wa ba-Baptistes kudìvwijayè bulongolodi. Nènku mpindyewu kùdi malongolodi mashiilèshìilàngàne nkàmà yisambòmbò ne makumi citèema ne àsambòmbò. Ne Mpenta pèndè wàkenza cintu cimwècimwè aci!

223 Butùmbi's we! Mbwalu kaayi abu? Nzambi ùdi munkaci mwà kujaadika ne Yèyè kèna mu bulongolodi kampànda to. Yèyè ùdi mu Nyumà, Nyumà Mwímpè. Àlèluuyàh! Àlèluuyàh! Èyowà's, mukalenge.

224 Yèyè kèna ùcyùka cìdi bulongolodi bwènu abu to. Ndukutukutu. Mbulamàkàne ne cyena Kàtòlikè ne baalùkile mu cyòci aci, ne kusòmbelamù, ne nudi nupeta cimanyinu cimwècimwè cidīye aci. Mwanjèlò kààkambakù ne: “Pàtukàayi munda mwèndè, nwènu bantu Bàànyi, ne kanwikadi baabanyanganyi bàà mpèkaatù yèndè to, nènku Mèmè nènkwàkidilè anyi”? “Kanùlengi bintu byèndè bikooyike abi to, nènku Nènkwàkidilè,” Nyumà Mwímpè ngudi wakula awu.

225 “Ne ewu yònsò udi wangata cimanyinu cyà nyama wa lwonji, anyi dileetà dyà dīnà dyèndè.” Mvw'a kujinga bwà twìkalakù ne



dìbà dyà kubwela mu cyôci aci; dìbà dyànyì dyàjiki. Dileetà dyà dìnà dyèndè ncinyi? Bwena Mishòònyì's. "Twènzàayi cimfwànyì cìfwànàngàne naaci. Twènzàayi bulongolodi. Wetù èkèleeziyà ùdi munène ànu mùdì èkèleeziyà wa Kàtòlikè amu." Kwangatabò bintu byònsò ebi. "Bàvwa ne èkèleeziyà minène, ne twètù pèètù, tudi naayi. Tudi ne cipidì cyà bantu bàà mu cimenga emu, mu èkèleeziyà wetù, ànu cyà mwomùmwe ne cìdibò naaci mu yààbò aci. Twènzàayi cimfwànyì cyà nyama wa lwonji." Kàdi cìdì Bible mwàmbe ncinyì, yèyè ùdi "MUKAJI WA MASANDI," ne yèyè awu ki "NDUMBA," mu bulongolodi.

226 Kàdi Èkèleeziyà wa Nzambì udi ne mwoyi mmudishikàmìne. "Ewu udi Mwànà mwenzè mudishikàmìne mmudishikàmìne cyà bushùwà." Pàtukàayi muntwamu! Ujìibwayi ne Nyumà wa Nzambì.

Matùnga àdi munkaci mwà kukòsoloka,  
 Izàlèlèlè munkaci mwà kutàbuluka,  
 Bimanyinu byàkadyànjlà Bible kwamba;  
 Matùkù à bàà Bisàmbà byà bendè mmabala ku  
 byanza, mùle tètè ne bintu bìdì bikwàcishà  
 bwòwà;  
 "Alùkilaayi, Éyì nwènù bàdì batangàlake, kùdì  
 bàà kwènù."

Ditùkù dyà bupikudi dìdì pabwìpì,  
 Myoyi yà bantu yidi yamba kwimana bwà  
 bwòwà;  
 Újìibwayi ne Nyumà wa Nzambì, myèndù yènù  
 milongolola ne misukula,  
 Bàndulukàayi! Bupikudi bwènù bùkaadi  
 pabwìpì. (Amen.)

227 Mùshindù mwine ùdi maalu munkaci mwà kwenzeka's wè!  
 Yèyè mmwàmbe, mu matùkù à ndekeelu ne: "Kanùcìinyi nànsha,  
 kasumbù kakesè kàà mìkòòkò. Ndiswa dyà Taatù wenù dyà  
 kunùpèèsha Bukalenge," basòmbe pàmwe mu myaba yà mu  
 Dyulu.

228 Ne nwènù ba-Méthodistes, ba-Baptistes, ba-Presbytériens,  
 bàdì basekè Mpenta abu. . .

229 Nènku, ndi ngàmbe ne, Mpenta ùdi dijinga ne mfimbu  
 mwimpè wa kale wa Èvànjeeliyò wa cyena kale, bwalu  
 bàdì bàdìvwija bulongolodi. Assemblées miinè yà Nzambì  
 mmikabwele mu—mu udi mutàmbe bunène wa ku Mpenta awu,  
 ukaadi mushàale wa mu nsangilu wa maèkèleeziyà, ànu wa  
 mmwènekèlu wa kwisùkwisù ne kàyì ùcyùka myandà. Ne cìdì  
 citàmbe bubì cínkaadìku mumòne Nyumà Mwimpè mwenzè,  
 pàmwe ne cyònsò, cìvwa nku bayiishi bàà beena Mpenta. Pa  
 nànkù kwèdì meeji, ne bwalu udi wa mu èkèleeziyà wa beena  
 Mpenta, udi musùngidìibwe to.

<sup>230</sup> Udi musùngìdìibwe ànu paùdì mubàtìijìibwe cyà bushùwà ne Nyumà wa Nzambi, ku Nyumà Mwimpè, mudisangè Nendè mu Bukolè bwà dibùikà Dyèndè dyà ku lufù, ùpàtuka ne bimanyinu ne maalu à kukèma, wenda ulonda Nyumà awu kwònsò kùdìYè ùya aku. Bimanyinu bivwa byènda bilonda baprófetà. Bimanyinu byàkalonda Yesù Kilistò. Bimanyinu byàkalonda bàpostòlò. Yèyè wàkamba ne: “Bimanyinu ebi nebìfile,” too ne pààlukilàYè cyàkàbìdì.

“Aci ncìvwa Cyòci aci cyàmbè anyi, Mwanèètù Branham?”

<sup>231</sup> “Ndàayi pa buloba bujimà, nùkayiishe Bukolè ebu ne dileeja patòòke kùdì ditùnga ne ditùnga dyònsò.” Kàdi nkupàngike byàbisàtù bìbìdì byà cyòci aci, bìdì, kabiyikù byanjì kuCyùmvwe nànsha. “Ne bimanyinu ebi nebìfile aba.” “Aba’s!” “Ditùnga ne ditùnga dyònsò!”

<sup>232</sup> Butumbi’s wè! Yoyòyò! Kaa, ekèlekèle! Pàmwàpa newèlè meeji ne ndi mupàle. Mwanèètù, ndi nkwambila ne, mèmè ntu munangè ntèndeleeleu mwimpè wa kale ewu. Èyowà’s, mukalenge, ùdi ùkwelesha lwongò mu Kilistò!

<sup>233</sup> Mpindyewu nudi numòna cìdì cimanyinu cyà nyama wa lwonji aci anyi? Ncimanyinu cyà dipàmbuka. Mmuntu udi . . . udi wela ànu meeji cyanààna, ne: “Èè, mèmè ndi wa mu èkèleeziyà, ne ndi mwimpè ànu mùdì muntu udi ulonda awu amu. Ncyènakù wa mu èkèleeziyà ewu anyi?” Nènku udi ujingulula, mwaba ùdì bulongolodi bwà èkèleeziyà wenù unùdì nweyemena, kùdìbu bufùmine anyi? Nudi nujingulula anyi?

<sup>234</sup> Bible mmwàmbè ne: “Ewu udi ukuukwila nyama wa lwonji, ùdi ùpeta cimanyinu cyèndè, anyi dileetà dyà dìnà dyèndè,” mpindyewu tàngilàayi ne: “pa mpàla anyi cyanza,” mbwe,na kwamba ne *dimanya* anyi *cyenzedi*. Aci kacýèna cyùmvwija ne udi ne lusàlu lunène kwìsù to. Kabyèna bìkèngela bwà kwikalabì nànkù to. Kacyèna cyàkula bwà byà pambèlù to. Cìdì cyàkula bwà cyà nyumà.

<sup>235</sup> Nènku mutàngilaayi nùmonè cìdiye mumanyè pa Mifundu. Mutèlèlèjaayi nùmonè kùyaayàye. “Muntu kanà yònsò yèyè kàyi ne Dilongesha edi to, kakwèna Bukènkè munda mwèndè to,” mùdì Bible mwambè. Nwamònu anyi? Nwamònu anyi? Tàngilàayi nùmonè kùyaayàye. Tàngilàayi nùmonè cyènzènzàye.

<sup>236</sup> Yèyè ne: “Èè, mèmè—mèmè’s ndi mwena. Ndi mwena Mishònyì. Èyowà’s, mukalenge. Ndi—ndi wa mu èkèleeziyà kampànda ewu. Èyowà’s, mukalenge.” Nènku mu dyàlumingu nudi ànu ne ndambù wa kaneemu bwàdì bwà kupàtuka kulwa mu mvùla. Ùdi ùpweka, pamutù pàà kuya mu disangisha dyà milòmbò, neùkangè èkèleeziyà, ne usòmba bwà kubandila ntèlèvìziyò. Ùdi ùpàtuka apa ùnwa maalà ne wènza maalu à lukutukutu, ne wènza maalu bu bakwàbò bàà pa buloba, kàdi pèndè’s ngwa mu èkèleeziyà. Vùlukaayi ne, kí cimanyinu cyà mpèkaatù ncyòci aci.

237 Mpindyewu túbalàayi too ne kwìnshì ndambù, lùkàsàlùkàsà, ne pashìishe nènjkijè. Tukàadi díbà dipita. Túbalàayi mpindyewu mvensà mwí6.

*Nènku ngákamòna mukàjì awu mpindyewu (èkèleeziyà) mukwàcike mashi à bansantu, . . .*

238 “Mukwàcike mashi à bansantu.” Nudi bamanyè’s, Bible mmwâmbè, pàakabùtudiibwàye, bwà ne muntu ne muntu wa cifwàkà wàkafwà awu, pa buloba, dipiilà dyàkasanganyiibwa mu èkèleeziyà wa Kàtòlikè. Menemene, ku cibangidilu.

*. . . ne mashi à bàdì bafwìle diitabuujà dyà Yesù: nènku. . . (Yone ngudi munkaci mwà kwakula awu mpidyewu) . . . nènku pangàakamumòna, ngaakakèma ne dikàcila dinène.*

239 Mmwàkamba Yone! Mpindyewu tutàngilàayi kùnweku. Yone kwambayè ne: “Mémè kumutàngila; yèyè ùvwa mulenga be, èkèleeziyà munène mulenga wa dikèma. Ùvwa ne musumbà mujimà wà maèkèleeziyà malela kùdiye ne: ‘mamwëndè wa bandumbà.’ Ki mémè kutàngila paanyimà pàapa, kàdi mmunyi mùvwà mukàjì awu mufwànyine. . . Ùvwa munkaci mwà kupàtula dilongesha dyà mashimi adi, ùfikisha bamfùmù bônso ne bantu banène kudikwàcika naadi. Kàdi’s ki bânà bèndè bàà bakàjì aba munkaci mwà kwenza cintu cimwècimwè aci. Kàdi, mémè kumutàngila; yèyè ùvwa mulenga wa dikèma!”

240 Kaaba kàmwè mu Mifundu mbâmbè ne: “Ndi musòmbe bu mukalenge-mukàjì ne ncyèna nkèngela cintu nànsha cimwè to.” Nwamònu anyi?

241 Nènku pashìishe yèyè, Yone, kwambayè ne: “Ngàakamukàcila. Ngàkamutàngila, ne kumutàngila ne dikàcila dinène. Ngàkamukàcila.”

*Ki mwanjèlò kungambilayè ne: Wàkèmi bwà cinyi? Nènkwanbùlè. . . Nènkwanbùlè bwalu busokoka bwà mukàjì awu, ne. . . nyama udi mumwambùle awu, wàkadi ne. . . mitù mwandamutekète ne nsèngù dikùmi.*

242 Mpindyewu tùmònàayibì ní tuvwa mu bulelèlè. Twètù ne cyena Kàtòlikè cyà bushùwà, díbà adi’s nudi bamanyè ne cyena Mishònyì cidi cicilonda. Pa nàнку udi ne. . . Wèwè, udi ne meeji búngì bukùmbàne bwà kumanya aci, nwamònu’s. Tàngilàayi.

*Nyama uwàmònu awu uvvaku awu, . . . kènakù to; ne ùdikù. . .*

243 “Nyama wa lwonji.” Mpindyewu tàngilàayi. Mpindyewu nenùmonè lwà apa nùнку ne, mbâmbè ne mbakalenge búngì kaayi bàvwàku; mwàkadishindàbo, umwe ùdi ne cyà kulwa.

*. . . ne neàbandè ùpàtuka mu bwinà bùdì kabùyì ne nshùkidilu, . . .*

244 Kî mpa Bible to! Ûpàtukila mu musùmbà wà miitabuujà à màjĩmbu muvwàcì cyenjũlbe amu. Kakwèna pàà kubishindamijila to. Udi upetela “mpùrgàtoriyò” penyi? Nkwépi kúdi upetela “byà kubèngà munyìinyi” ebi, ne “nsaserdòsè kàyì ùsèlangana,” ne bintu bikwàbò byònsò bidìbo bènza ebi, “kòmfesiyò”? Nudi nubisangana penyi? Kakwènakù mwaba nànsha wùmwe wà kucipeta to. Ncipàtùkile mu ifernò. Ki mùdi Bible mwambè. Mmupàtùkile, nyama awu, bukolè àbu, dilongesha divwàyi naadi: “Dipàtùkile mu bwinà bùdi kabùyì ne nshìikidilu.”

. . . ne diyè mu dibùtuka: . . .

245 Mpenyi pàdi “dibùtuka”? Ìfernò. Dyalùkile buludi mwaba ùdidi difùmìne.

. . . ne aba bàdi basòmbèle pa buloba nebàkemè, beena mènà àvwà kaàyi mafùnda mu mukàndà. . . kacya ku difukà dyà dyulu ne buloba, pàakatàngilàbo nyama wa lwonji uvwakù awu. . . udi kàyikù, kàdi pèndè mwikàlekù.

246 Mpindyewu, èkèleeziyà yà Mishònyì yidi yàmba ne: “Èè, aci cìdi mwà kwenzeka bìshi, pàdìbo bàmba ne: ‘Ndi ngìtabuuja Yesù Kilistò. Yèyè kí ngwanyì Musùngidi sungasunga?’” Dyabùlù pèndè’s, ùdi wìtabuuja, mwanèètù.

247 Bikèngela ciikalè difukuludiibwa, Dilediibwa dipyadìpyà, dilediibwa dyà cyàkàbìdi. Ne paùdi mulediibwe cyàkàbìdi, dìnà dyèbè ndifùnda mu Mukàndà wà Mwoyi wà Mwànà wa mùkòòkò.

248 Wèwè udi wamba ne: “Ntu misangu yàbùngì ànu ndìkonka. Èè, kàdi, ncyèna mwìmpè mùdi muntu mukwàbò anyi? Ncyèna mwìmpè bu musùmbà wènù nwènù bansantu babùnguluki bàà mu malaba bàà bìdingidingi abu anyi? Mèmè ndi ne meeji. Ndi naawu mu. . . Ndi ne mapòlomè. Ndi mupàtùkile ne cilongelu citùmbùke. Ndi mufùmìne mu dìkù dilenga. Bààkwètù bàwva bidimba byà èkèleeziyà, kumpàla kwànyì. Ncyènakù mwìmpè bu nwènù anyi?”

249 Mbàmbè ne: “Buloba bujimà,” beena Mishònyì ne bònsò, “bààkakàcila,” bònsò pa kuumusha bàdi ne mènà mafùnda mu Mukàndà abu.

250 Mènà àkafùndiibwa bwà cinyì? Bàdi Dimiinu dyà Abraham ne: “ne bàdi bapyànyì bilondèshile mulayì, basungula kumpàla kwà difukà dyà dyulu ne buloba.” Ki bwà cinyì kabèèna bàdyèla nkonko to. Mònaayi apa, mpindyewu tàngilàayi cyàkambàye. Tàngilàayi aba mu Mukàndà wà Mwoyi wà Mwànà wa mùkòòkò.

*Kàdi ki meeji àdi ne lungenyi ngwòwò aa.*

251 Mpindyewu ndi muswè kunùkonkakù cintu kampànda. Lungènyì ndimwè dyà ku mapà à Nyumà Mwìmpè anyi? [Disangisha didi dyàmba ne: “Amen.”—Muf.] Ncyà bushùwà

anyi? Mbanganyi bàdì biitabuuja ne Bible, Kolintò wa Kumpàla 12, ùdì ùlongesha ne mapà ne byònsò mu èkèleeziyà, ndungènyì, tùmònèbi, òmòwè dyà ku mapà? Èè, mmunyi mùdìku mufwànyine kwamba ne kakwèna dyakula dyà mu myakulu dîbà adi? Udi wamba bishi ne kakwena dyandamuna dyà myakulu? Mmunyi mùdì mufwànyine kwamba ne, kakwena dyondopa dyà kùdì Nzambi? Bwalu mubidi wùmwe wùmwe awu. . . Mémè mwikale mubidi, mwikàle ne cianza ku *elu* luseke, ne cianza ku *elu* luseke, ne dikàsà mwaba *awu*, mmunyi mùdì mwà kwamba ne cianza cidìkù, kàdì dikàsà kadìyìku to? Kùvwakù mùmwè cyàkambà Pòlò aci anyi?

<sup>252</sup> Mpindyewu tàngilàayi, ùdì wàkula mu matùkù à ndekeelu, wàmabila Mubidi buludi, wàmaba ne: “Apa nkùdì ewu udi ne lungènyi.” Kaa, mémè ntu munange eci. Kaa, ekèlekè! Cìikalà mwà kunupapula ncyòci eci’s. Tèelejàayi eci. Eyo. “Apa ke pàdì meeji àdì ne lungènyi.” Pìikalàbi ne mapà à Nyumà Mwimpè awu kî mmafikè ku cikondo cyònsò aci to, bwà cinyì yèyè wàkakaala cyòci eci bwà matùkù à ndekeelu dîbà adi? Pìikalàbi ne kakwàkàkàla mapà mu èkèleeziyà, mu matùkù à ndekeelu to, bwà cinyì yèyè mmuludike cyòci eci ku matùkù à ndekeelu dîbà adi? “Apa nkùdì ewu udi ne lungènyi.”

. . . *Mitù mwandamutekète mmikùnà  
mwandamutekète, yidì mukàjì awu musòmbèlepù.*

<sup>253</sup> Ntukùnà búngì kaayi? Mbimenga búngì kaayi pa buloba apa, nànsha nànkù, bidì èkèleeziyà kampànda musòmbèle pa tukùnà mwandamutekète? Ànu cimwèpelè. Aci cidì penyi? Cimenga cyà Vatican mu Loomò. Ncyà bushùwà anyi? [Disangisha didi dyàmaba ne: “Amen.”—Muf.] Bible mmwàmbè ne mukàjì wa masandi udi ukwacisha bwòwà ewu wàkenza bwà buloba bujimà ebu bwendè masandi, ne kulela musùmbà wà bàna bàà bakàjì bwà kulongeshabò pàmwe ne cintu cimwècimwè cyàkenzàye aci; kabàvwa babì bu yèyè to, kàdì bàvwa bandumbà. Wàkabàlongesha cintu cimwècimwè aci. Yèyè kwamba ne: “Cibangidilu cyàci neciikalè mukàjì,” anyi èkèleeziyà, “musòmbèle pa tukùnà mwandamutekète,” mu Loomò. Kî mémè kutàngila pa buloba bujimà; ngambilàayi mwaba ùdici, “èkèleeziyà musòmbèle pa tukùnà mwandamutekète.” Mpindyewu ndi mbadila eci mu Bible.

*Ne kùdì bamfùmù mwandamutekète: bàtaanu bàkaadi  
bafwe, . . .*

<sup>254</sup> Bu twètù mwà kwangata bwalu bulonda, ne kwalukila buludi ne kubùleeja, mùvwà bamfumu bafwìle, mu Loomò, kacya ku bukalenge bwà Baabùlòonà.

. . . *umwe ùdì (Neron), ne umwe ùdì ne cyà kulwa;  
ne. . . ùdì ne cyà kutungunuka cipòlò cipì (ngondo  
mitwè ku yisambombo) pàalwàye.*

255 “Ne nyama wa lwonji. . .” Éyì! Tàngilàayi eci. Mpindyewu bukolè nebwàngate mwaba wa bampàngaanù.

*Ne nyama wakadiku awu, ne udi kàyiku awu,  
nànsha. . .ngwa mwandamukùlù, (mpindyewu  
tàngilàayi) ne ngwa ku bàà mwandamutekète, . . .*

256 Nwênù bônso’s nudi bamanyè mùvwàye mfùmù wa wùkwàcisha bwôwà. Yéyè wà- . . .Wàkaswikila mamwëndè ku cikòkedi cyà tubalu ne kumupulumuna mu misèèsù, ne kutwà cimenga mudilu, ne kuya kasokoma ku kakùnà. Nyumà wa mùshindù ùmwèùm wè awu ngudi ukòòkesha èkèleeziyà udi musòmbe mu mwaba wa bampàngaanù awu’s. “Wa mwandamukùlù, udi wa umwe wa ku mwandamutekète awu. Ne pashìishe yéyè ùdikù, ne kàciyìkù to; ne ùdikù, ne kàciyìkù to; ne ùdikù, ne kènàkù to,” too ne kwìnshì.

*. . .ne kuya mu dibùtuka.*

257 Too ne ku cikondo cyà Dilwa dyà Mukalenge, ne yéyè mmwediibwe mu ifernò.

*Ne nsèngu dikumi yiwámònu ayi mbamfùmù dikumi,  
bàdi kabàyi bánji kupeta makalenge mìnè to; kàdi  
bapetè bukòòkeshi bu bamfùmù munda mwà dîbà  
dìmwèpelè pàm wè ne nyama wa lwonji.*

258 Kaa, bu ne tuvwakù ànu ne. . . “Kabàyìku bánji kupeta bukolè nànsha bùm wè to.” Bòbò abu kí mbakalenge to. Kabàvwa ne. . .Kabèèna mwà kwikala naabò to. Nsèngu ayi kayìvwa ne bifulu byà butùmbi to. “Bààkapeta bukolè bu bamfùmù.” Ncinyì ciinè aci? Bamfùmù bàà cimbàmbilà; kí mbakalenge baashìibwe cifulu cyà butùmbi to. Bamfùmù bàà cimbàmbilà! Kaa, ekèlekèlè!

259 Mpindyewu, kaa, pândi mbala cyòci eci, mîngà misangu mwoyi wányi wùtu wùzùka ne disànka, èyo, pândi ngèèla meeji mùshindù wutùdì ne mwoyi mu ditùkù dyà ndekeelu edi.

*Ne nsèngu dikumi yiwámònu ayi mbamfùmù dikumi,  
bàdi kabàyi bánji kupeta bumfùmù to; kàdi bàdi bàngata  
bukòòkeshi bu bamfùmù munda mwà dîbà dìmwèpelè  
pàm wè ne nyama wa lwonji.*

*Aba bàdi ne meeji àmwè, ne nebàfilè bukolè bwàbò ne  
dikàndà kùdì nyama wa lwonji.*

*Bòbò aba nebàlwishe Mwànà wa mùkòòkò mvità, ne  
Mwànà wa mùkòòkò neàbàtàmbe bukolè: . . .*

260 Ki Mvità yà Harmageddon yìlwalwà ayi; midìlongòlòle bwà Bukalenge bwà bidimu cinunu.

*. . .bwalu yéyè ùdi Mukalenge wa bakalenge, ne  
Mfùmù wa bamfùmù: . . (kanùnyùkushiibu nànsha) . . .  
ne aba bàdi nendè mbabùkìdìibwe, basungula abu, . . .*

261 Kî ngwêwè to; Yéyè ngudi musungùla. Wêwè ne Nyumà Mwimpè, bivwa bikèngela wêwè kwela mbilà yà bucimunyi. Nzambì mmukusungùle kumpàla kwà difùkà dyà dyulu ne buloba. Pawikalà kùyi mwà kumòna Bukènkè bwà Èvànjeeliyò to, mbwalu udi—udi ànu mpofo menemene.

*. . . basungula, ne beena lulamatu.*

*Ki kungambilayè ne: Mâyì awùdi umòna awu, mùdi mukàji wa masandi musòmbe, mbisàmbà, . . . misùmbà, ne matùngà, ne myakulu.*

262 Mu ngaakwilù mukwàbò, mukàji udi musòmbe apa ewu, èkèleeziyà awu, neàfilè dilongesha dyèndè kùdi bantu bônso, musùmbà wà bantu bônso, ne mwakulu. S'ki yéyè awu. Úvwa mubàkòòkèshe. Mmusòmbe kumutù kwàbò, bukolè bùdi munkaci mwà kubàkòòkèsha. Mukàji awu mmusòmbe pa tukùnà mwandamutekète, mulwàte bilàmbà bikünze, bilamika mabanji à pa buloba. S'ki yéyè awu.

*Ne nsèngù dikùmi yiwàmònu pa nyama wa lwonji ayi, eyi neyùkalè . . .*

263 Tàngilàayi mpindyewu, nudi nubwela mu makolè à communisme.

*. . . aba nebàkinè mukàji wa masandi awu, ne nebamuwije mubungàme ne butaka, ne nebàdye munyiinyi wendè, ne nebàmwoshè ne kapyà.*

*Bwalu Nzambì mmutèèke mu myoyi yàbò bwà kukumbajabò diswa dyèndè, ne kwitaba, ne bàfila bukalenge bwàbò kùdi nyama wa lwonji, too ne pùikalà méyi à Nzambì . . . mwà kuula.*

264 Àlèluuyàh! “Maulu ne buloba nebìjiminè, kàdi Dìyi dyà Nzambì kadyàkujiminakù to.” Tàngilàayi!

*. . . mukàji úvwà mumòne awu . . .*

*. . . mukàji úvwà mumòne awu n'cimenga cinène aci, cidi cikòòkeshà pa bamfùmù bàà pa buloba.*

265 Ndeejàayikù cimenga nànsha cimwè pa buloba cidi cikòòkeshà bamfùmù bàà pa buloba, mu mùshindù wònsò wùdi muswè awu, pa kuumusha bulombodi bwà Kàtòlikè mu Loomo, musòmbe pa tukùnà mwandamutekète. Cimenga nànsha cimwè, ne kacivwakù, ne kacydya kwikalakù to; pa kuumusha Cimenga Cipyacipyà cidi cífùmina mu Dyulu aci. Ncyà bushùwà.

266 Mpindyewu, indilaayi katanci kakesè cyanààna. Ndi muswè kunùleeja cyàkàbidi cyôci eci, bwà Mukalenge kwikalayè kutàmba kuvùluka ne kutùbènèshakù pàmwè patùdi tubala cyôci eci apa. Èyo. Tàngilàayi kùneeku mpindyewu, ndi mbala nshapità wa 13. Ndi mbangila ku mvensà wa 15.

*Ne yéyè ùwà ne bukolè bwà kufila mwoyi ku cimfwànyì. . .*

267 Aci's mmu États-Unis, utùdì bamòne cibànda, nudi numòna's, cimfwànyì.

*. . . ne cimfwànyì cyà nyama wa lwonji cìwà cìfwànyìne kwakula kabìdì, ne kwenza ne bààbùngì bààbèngà bwà kukukwila cimfwànyì cyà nyama wa lwonji nebàshipiibwè. (Adi ndyenzejangana dyà maalu ku bukolè.)*

*Ne yéyè kwenzeja bònsò, bakesè ne banène, babanji ne bapèlè, bapika ne badishikàmine, bwà kupeta cimanyinu mu cyanza cyàbò cyà dyàbalùme, anyi mu mpàlà. . . -mwàbò.*

*Ne mùshindù wà ne muntu nànsa umwe kì mmufwànyìne kusùmba anyi kusùmbisha, pa kuumusha ewu uwà ne cimanyinu, anyi dìnà dyà nyama wa lwonji, anyi nombà wa dìnà dyèndè.*

268 Mpindyewu tângilàayi, mpindyewu, ne ntèmà mpindyewu, ne ntèmà yònsò, kumpàlà kwà twètù kujikija. Mvensà wa 18. Tèelejàayi.

*Lungènyi ndwòlò elu.*

269 Nudi numòna Nyumà Mwímpè ùbìikila beena kwitabuujà mu ditùkù dyà ndekeelu anyi? Kasùmbu kakesè aku, kàakula, kàbìikila kasùmbu kakesè mu ditùkù edi ne: “Apa mbwà ewu udi ne lungènyi mu èkèleeziyà. Ûmvwè eci.”

*. . . Ewu udi ne luumvu ùdì ne àbalè nombà yà nyama wa lwonji, bwalu n'nombà wa muntu, (ki n'ditùnga to) muntu; ne nombà wendè ùdì nkàmà Yisambòmbò makumi asambòmbò ne yisambòmbò.*

270 Nènku ànu kumutù menemene kwà Cimenga cyà Vatican. . . Kùngambìdiku mpindyewu to; ndi ne *Malelèlè À Dütabuujà Dyètù*, ne byònsò, nwamònu's. Kumutù kwà Cimenga cyà Vatican, ne paapà mwimanè bu “mupinganyi wa Mwàna wa Nzambì.” Ndi ne balundà bàanyi beena Kàtòlikè basòmbe kaaba aka mene, bàwà beena Kàtòlikè, basòmbe kaaba aka ne bamanyè ne aci mbulelèlè. Bàà kwètù, pàmwàpa, kumpàlà kwànyì, bàwà pààbò beena Kàtòlikè. Nwamònu anyi?

271 Bààkabiikila Patrick Munsantu ne mmwena Kàtòlikè, kàdì yéyè kàvwakù mwena Kàtòlikè to. Kwambabo ne Jeanne d'Arc ùwà munsantu; kàdì bansaserdòsè kumwoshabò bu muloji. Kabyèna bikèmesha to pààkambà Yesù ne: “Nudi nulaaba lupèmbà lutòòke ku nkita yà bapròfetà, kàdì nwènù mbàdì babeelèmu, nudi nulaaba lupèmbà lutòòke ku bimanu.” Ncyà bushuwà.

272 Tângilàayi, nnombà wa muntu. Nènku kumutù kwà paapà wa ku Loomò aku, mbafunde ne: “VICARIVS FILII DEI.”



Ncifùnda mu màleetà à cyena Loomò. Funda wêwè ànu cyanààna, maalaba. V, I, C, I, R, kaa, ikàlaayi ànu bacilame, mu màleetà à cyena Loomò, ne nwèlè kashoonyi mwinshi ne nùkeelè kuulu, ne numònàayi cinùdi nupeta: nkàmà yisambòmbò ne makumi àsambòmbò ne yisambòmbò. Mmusòmbe penyi? “Pa tukùnà mwandamutekète.”

<sup>273</sup> Nènku mwômò amu ki mwàkapàtukilà bulongolodi bwà ntèndeleeu, bwàkalongesha dīyī diswika pamutù pàà Bible. Ne beena Mishòònyī mbàbwayikilamù, ne bènza ànu cintu cìmwècìmwè aci cidibo bènza, bwalu nDyàmbe ne yèyè ùvwa “MUKÀJÌ WA MASANDI,” ne bàvwa “BANDUMBA.” Kupàtukamù ne dibàtiiza dyà mashimi, ne ntèndeleeu wa mashimi, mwikàle ne mmwènenu wa mashimi wa Nyumà Mwímpè, ne mmwènenu wa mashimi wa ifernò, ne bintu byònsò ebi mùshindù awu, ne beena Mishòònyī bènda bàlonda ànu mu dikàsà.

Kàdi nekwikalè Bukènkè ku ìbaamulòòlò,  
Kajila kàà mu Butùmbi nenùkàpetè bushùwà;  
(Ncyà bushùwà.)  
. . . njila, ki wùdi Bukènkè leelù ewu,  
Bajiiikùibwe mu Dìna dyà mushinga mukolè  
dyà Yesù.  
Bànà ne bakolè, nyingàlàlaayi ku mpèkaatù  
wenù yònsò,  
Nyumà Mwímpè neàbwelèmu bushùwà;  
Makènkè à dilòòlò àfiki,  
Mbulelèlè ne Nzambì ne Kilistò bàdi Umwe.  
(Amen!)

<sup>274</sup> Mwanèètù, ndi nkwàmbila ne, makènkà à dilòòlò àdi munkaci mwà kukenka. Dilongesha dimwèdimwè dyà bàpostòlò adi, dibàtiiza dimwèdimwè dyà bàpostòlò adi, dyujiibwa dimwèdimwè dyà Nyumà Mwímpè dyà bàpostòlò adi, bimanyinu bimwèbimwè byà bàpostòlò abi ne maalu à kukèma, bìdi munkaci mwà kwela mbilà too ne kùdi bàà Bisambà byà bendè; mwàkenzelàbo beena Yudà, kale wàwa ku ntwàdijilu kwà dindà, s’ki cyòcì eci mu dibwela dyà dībà.

Kùdi bantu pabwìpì ne myaba yònsò,  
Ne myoyi yònsò yà munda yilàkuka  
Ne Kapyà kàakamatà mu dyà Mpenta aku,  
Kàakabàkezulà ne kubàvwija bakezùke aku;  
Kaa, Nkaakòosha mpindyewu munda mwà  
mwoyi wànyì,  
Kaa, butùmbi kùdi Dìna Dyèndè!  
Ndi ne disànkà dyàbùngì dyà kwamba ne ndi  
umwe wabò.

Umwe wabò, ndi umwe wabò,

Ndi ne disànkà dyàbùngì dyà kwamba ne ndi  
umwe wabò;  
Umwe wabò, umwe wabò,  
Ndi ne disànkà dyàbùngì dyà kwamba ne ndi  
umwe wabò.

Bàvwa basangìle mu cibambalu cyà kuulu,  
Bònsò munkaci mwà kusambila mu Dìna  
Dyèndè,  
Bààkabàtijiibwa ne Nyumà Mwímpè,  
Ne Bukolè bwà mudimu bwàkalwa;  
Mpindyewu cyàkabènzèlàYe mu ditùkù adi aci  
Yèyè neàkwenzèlèci byà mwomùmwe,  
Ndi ne disànkà dyàbùngì dyà kwamba ne ndi  
umwe wabò. (Kàdi nwènù?)

Lwàkù, mwanèètù wanyì, kèba dibènesha edi  
Dyàkezulà mwoyi wèbè ku mpèkaatù,  
Nedìbangè kudidisha ngonga yà disànkà  
Ne nedilàkushè musùukà wèbè ne kapyà;  
Kaa, ki kooshadi mpindyewu mu mwoyi wànyì  
eku,  
Kaa, butùmbì kùdì Dìna Dyèndè,  
Ndi ne disànkà dyàbùngì dyà kwamba ne ndi  
umwe wabò.

<sup>275</sup> Kaa, bwà Èvànjeeliyò wa butùmbi ewu!

Nyèwù ùzònta mashi, èyowà, ùdi munkaci  
mwà kuzònta mashi,

<sup>276</sup> Eela meeji ku mushinga! “Bu yèyè mysà kuNdonda, àdìvile,  
àmbulè nkùrusè wèndè,” lufù, “ne àNdòndè Mémè.”

Èvànjeeliyò wa Nyumà Mwímpè ewu ùdi  
ùzònta mashi,  
Mashi à bayiidi bààkafwilà Bulelèlà abu,  
Èvànjeeliyò wa Nyumà Mwímpè ewu ùdi  
ùzònta mashi.

Wa kumpàlà bwà kufwilà bwà ndongamu wa  
Nyumà Mwímpè ewu,  
Ùvwa n'Yone Mubatiji, kàdi wàkafwà bu  
muntu;  
Pashiishe Mukalenge Yesù kulwayè,  
kuMupoopelabò pa nkùrusè,  
Wàkayiisha ne Nyumà ùvwa mwà kusùngila  
bantu ku mpèkaatù.

Kùvwa Peetèlo ne Pòlò, ne Yone wa Nzambì,  
Bààkafila myoyi yàbò bwà Èvànjeeliyò ewu  
wàmòna mwà kukenka;  
Bààkasambakaja mashi àbò, ne bapròfetà bàà  
kale,

Nànkù Dîyì dilelèlè dyà Nzambì divwa mwà  
kwambiibwa ne meeji matòòke.

Pashiishe bààkaasa Stèfanò mabwe, yêyè  
wàkayiisha ùlwisha mpèkaatù,  
Kubàfikishayè munda bikolè, mu mùshindù  
wà ne bôbò bààkamuzaaza bwongò;  
Kàdi yêyè wàkafwà mu Nyumà, wàkakùlà  
mwoyi,  
Ne kuya katuutakeena ne bakwàbò, bàkakùlà  
mwoyi abu.

Ùdi ùzònzà mashi, èyowà, ùdi ùzònzà mashi,  
Èvànjeeliyò wa Nyumà Mwímpè ewu  
kutùngunukayè ne kuzònzà mashi,  
Mashi à bayiidi bààkafwilà Bulelèlè abu,  
Èvànjeeliyò wa Nyumà Mwímpè ewu  
kutùngunukayè ne kuzònzà mashi.

Misùùkà yìdi mwinshì mwà cyoshelu ayi, yìdi  
yèla lubilà ne: “Too ne dîbà kaayì?”  
Bwà Mukalenge kunyooka aba bàdi benze bibi;  
(Bèèlulwila, nwamònu’s. Kaa, èkèlekèle!)  
Kàdi nekwìkalè bakwàbò kàbìdi bààfilà mashi  
à mwoyi wàbò  
Bwà Èvànjeeliyò wa Nyumà Mwímpè ewu ne  
lukòkà lwèndè lukünze bu mashi alu.


Ùdi ùzònzà mashi, èyowà, ùdi ùzònzà mashi,  
Èvànjeeliyò wa Nyumà Mwímpè ewu ùdi  
ùtùngunuka ne kuzonza mashi,  
Mashi à bayiidi bààkafwilà Bulelèlè abu,  
Èvànjeeliyò wa Nyumà Mwímpè ewu ùdi  
ùzònzà mashi.

<sup>277</sup> Tùkudimukàayi, tùlabulanganàayi ku cianza muntu ne  
mukwèndè mpindyewu.

Ùdi ùzònzà mashi, èyowà, ùdi ùzònzà mashi,  
Èvànjeeliyò wa Nyumà Mwímpè ewu ùdi  
ùzònzà mashi  
Mashi à bayiidi bààkafwilà Bulelèlè abu,  
Èvànjeeliyò wa Nyumà Mwímpè ewu ùdi  
ùzònzà mashi.

<sup>278</sup> Nudi banange Mukalenge anyi? Mukalenge ànùbènèshè.

<sup>279</sup> Taatù, tudi tulòmba bwà Ùbenèshèku batèèleji aba, ne  
swàkù bwà bàalukilè mu mààbò bènda bàcyònkomoka. Swàkù  
bwà bàlwe ku Mpokolo mùle ne Mashi, makoka mu mijilu yà  
Èmanùwèlè. Swàkù bwà bàlekelè bwena èkèleeziyà bwònsò bwà  
kale abu, ne bàlwe bàpetè Nyumà Mwímpè. Tudi tulòmba mu  
Dinà dyà Yesù. Amen.

 Nzambì ànùbènèshè. Dilòòlò dilenga. Nzambì ìkalè neenù.

54-0513 Cimanyinu Cyà Nyama Wa Lwonji  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)